

Yangi yil — orzu-umidlar
va ulkan niyatlar bayrami!

MILLIY ARMIYAMIZ YANGI O'ZBEKISTONNING MUSTAHKAM QALQONIDIR!

VATANPARVAR

● Gazeta 1992-yilning 24-iyunidan chiqa boshlagan ● 2023-yil 29-dekabr, №52 (3062)



BIZ
HAQIMIZDA

@vatanparvar-bt@umail.uz

f facebook.com/mudofaavazirligi

t.me/mv_vatanparvar_uz

instagram.com/mudofaavazirligi

t.me/mudofaavazirligi

youtube.com/c/uzarmiya

IJTIMOIIY-SIYOSIIY, MA'NAVIY-MA'RIFIY, HARBIY-VATANPARVARLIK GAZETASI

www.mv-vatanparvar.uz

*Yangi yil muborak,
yurtim mardlari*

Oqlikka o'ralgan yurtim charog'on,
Yangi yil kutmoqda el-elatlari.
Uning hur baxtini asrovchi qo'rg'on,
Siz borsiz, Vatanning azamatlari,
Yangi yil muborak, yurtim mardlari!

Siz borsiz — tinchlik bor, bayram asli shu,
Hur baxtin ardoqlar elning norlari.
Bu yurtni bayramlar e'zozlar mangu
Zero Vatan deydi alp sardorlari,
Yangi yil muborak, yurtim mardlari!

Zulfiya YUNUSOVA



SARHISOB PALLASIDAGI YO'QLOVLAR

Yaqinlashib kelayotgan Yangi yilni har kim ayrica bir sarhisob, o'ziga xos orzu-intilishlar bilan qarshilash arafasida. Bu yil ham mamlakatimizda muvaffaqiyatlar ko'p bo'ldi. Ko'plab xonadon ahlari kutilmagan yutuqlar, mukofotlar bilan taqdirlandi. Ana shunday sarhisob pallasida urush faxriylari xonadonlari sohib va sohibalari ham Yangi yil oldi yo'qlovaridan behad shod bo'lishdi.



Mudofaa vazirining birinchi o'rinbosari – Qurolli Kuchlar Bosh shtabi boshlig'i general-mayor Shuxrat Xalmuxamedov, Qurolli Kuchlar faxriylari hamda mahalla faollari poytaxtimizning Mirzo Ulug'bek tumanida istiqomat qiluvchi Xayeva Ribakova hamda Zeytuna Muratova xonadonlarida Yangi yil bayrami munosabati bilan Prezidentimizning yo'llagan tabriklarini o'qib eshittirib, ajratilgan moddiy yordam pullari va qimmatbaho sovg'alarni topshirishdi.

90 yoshni qoralab, mahalladoshlari, yaqinlari ardog'ida yashab kelayotgan onaxonlar ko'rsatilayotgan bu qadar yuksak e'tibordan mamnun ekanliklarini bildirishdi. Ta'kidlash kerakki, ibratli hayot sohibalari yurtimizda hayotning tobora yaxshilanishi uchun amalga oshirilayotgan ishlarni atrofda qilargalarga, ayniqsa yoshlarga to'g'ri tushuntirib, oilani, Vatanni ardoqlash, tinchlikni asrab-avaylash, pok va halol mehnat qilish, doimo ilm va bilimga intilish inson baxtining eng asosiy omillari ekanligini qayta-qayta uqtirib keladi.

Kapitan Aziz NORQULOV,
“Vatanparvar”



Azal-azaldan xalqimiz yoshi ulug' nuroniylarni e'zozlab ularga katta ehtirom va hurmat ko'rsatib kelgan. Ayniqsa, tabarruk insonlarning holidan xabar olish, ularning og'irini yengil qilish va nasihatlarini-yu dualariga quloq tutish xalqimizga xos fazilatidir.

Nuroniylarga bayram sovg'alari



Yangi yil bayrami munosabati bilan O'zbekiston Respublikasi Qurolli Kuchlari Harbiy meros va zamonaviy tadqiqotlar instituti boshlig'i general-leytenant Shavkat Normatov boshchiligidagi harbiylar Mirzo Ulug'bek tumanida istiqomat qilayotgan Ikkinchi jahon urushi faxriylari – Valeriya Sopriko va Zinaida Bolochenkova xonadoniga tashrif buyurdi.

Yangi yil bayrami oldidan mehnat faxriylari va urush qatnashchilarining holidan xabar olinib, O'zbekiston Respublikasi Prezidentining Yangi yil tabrigi o'qib eshittirildi. Ayyom munosabati bilan yo'llangan tabrikda davlatimiz rahbarining “Hech bir inson jamiyatimiz va davlatimizning mehri va e'tiboridan chetda qolmaydi” degan so'zlari bugun hayotda o'z isbotini topganligi ta'kidlandi. So'ngra bir martalik pul mukofoti, qimmatbaho sovg'alar topshirildi.

Samimiy muloqot davomida nuroniylar mamlakatimizda hukm surayotgan tinchlik va xotirjamlikni ta'minlash yo'lida mehnat qilayotganlarning zahmatlari munosib qadrlanayotgani haqida fikr bildirishdi.

Urush va mehnat faxriylari o'tmishning mashaqqatlarini eslab, bugungi farovon kunlarga shukronalik keltirishdi. Hozirda mamlakatimiz mudofaa salohiyatini oshirishdagi yutuqlarni e'tirof etib, yosh harbiylarni vatanparvarlik ruhida tarbiyalashda o'z ko'maklarini ayamaliklarini ta'kidlashdi.

Ro'ziqul OCHILOV,
“Vatanparvar”

Yangi yil bayrami munosabati bilan mudofaa vazirining jangovar tayyorgarlik bo'yicha o'rinbosari polkovnik Qodir Tursunov boshchiligidagi harbiy xizmatchilar poytaxtimizning Munavvarqori mahallasi Buyuk ipak yo'li ko'chasida istiqomat qiluvchi Ikkinchi jahon urushidan jabrlangan Nikolay Antonovich Pechenkin xonadonida bo'ldi.



YANGI YIL TUHFASI

Urush vaqtida va undan so'ng ko'plab medal va ordenlar bilan mukofotlangan otaxon samimiy suhbat davomida suronli yillarni esga olib, yurtimizdagi tinchlik va osoyishtalik naqadar muhim ekanini shukronalik bilan tilga oldi. Muborak 97 yoshni qarshilagan otaxon keksalarga ko'rsatib kelinayotgan g'amxo'rlik uchun davlatimizga Mudofaa vazirligiga o'z minnatdorligini bildirdi.

Shu kuni harbiy xizmatchilar Mirzo Ulug'bek tumanida istiqomat qiluvchi Ikkinchi jahon urushi qatnashchisi Vladimir Andreyevich Chmixun xonadonida ham bo'ldi. G'alabadan so'ng Toshkent shahriga yuborilgan va qolgan umrini shu yerda davom ettirayotgan otaxon bugungi tinch va osoyishta hayotning qadri nihoyatda yuqori ekanini, bugungi kunda nuroniylar va mehnat faxriylariga yaratilgan sharoitlar, e'tibor va g'amxo'rliklardan g'oyat minnatdor ekanini ko'zda yosh bilan alohida ta'kidladi.

Faxriylarga davlatimiz rahbarining tabrigi o'qib berilib, farmon bilan belgilangan pul miqdori va esdalik sovg'alari tantanali ravishda topshirildi.

Sherzod EGAMBERDIYEV,
“Vatanparvar”



Ikkinchi jahon urushi nafaqat insoniyatning moddiy olamiga, balki uning qalbi, dunyosi tomon qilingan yurish edi. Yillar o'tib, jang-jadallar, snaryadlar qoldirgan vayronalar obod bo'ldi. Ammo u kungi ko'ngillar hamon vayron, u kungi yo'qotishlar mudom og'riqli.

Qahramon umrlar sira o'lmagay...



Havo hujumidan mudofaa qo'shinlari va Harbiy havo kuchlari qo'mondonligining bir guruh harbiy xizmatchilari poytaxtimizning Yashnobod tumanida istiqomat qilayotgan Ikkinchi jahon urushi faxriysi, 98 yoshni qarshilagan Pavel Materikov xonadonida bo'lishdi.

Yurt posbonlari faxriy otaxonni bayram bilan muborakbod etishar ekan, uning bosib o'tgan shonli hayot yo'li barchaga birdek o'mak bo'layotganini alohida e'tirof etishdi. Hozirda ikki qizning mehribon otasi, ko'plab nabiralarning suyuqli bobosi bo'lgan Pavel Materikovga bayram munosabati bilan yo'llangan Prezident tabrigi o'qib eshittirilib, pul mukofoti va qimmatbaho sovg'alar topshirildi.

Buni qarangi, yurtimizning ko'plab go'shalarida urushning og'riqli iztiroblarini boshdan kechirib, bugungi kunda e'zoz va farog'atda yashayotgan yurtdoshlarimiz borki, ularni sira unutib bo'lmaydi. Alla Funtikova qiyofasida ularning hayot yo'lga nazar solish mumkin.

1945-yili Germaniyaning Ashaffenburg shahridagi konslagerda qizaloq dunyoga keladi. Onasi unga Alla deb ism qo'yadi. Urush tugab, oradan yillar o'tdi. Alla Funtikova hozirda 78 bahorni qarshilagan. Onaxon Toshkentning Yashnobod tumani “Navro'zobod” MFYda istiqomat qiladi. Harbiy xizmatchilar Alla Funtikova xonadonida bo'lib, samimiy suhbat qurishdi. Shundan so'ng onaxonga Yurtboshimizning bayram tabrigi o'qib eshittirilib, sovg'alar topshirildi.

Yurt o'g'lonlarining navbatdagi manzili 85 yoshli faxriy onaxon Nina Martinovaning xonadoni bo'ldi. Nina Martinova inson qadri ulug'lanayotgan Yangi O'zbekistonda ko'rsatilayotgan hurmat va izzatdan juda mamnun. Qahramonimizga ham Prezidentimizning bayram tabrigi o'qib berildi, pul mukofoti va qimmatbaho sovg'alar taqdim qilindi.

B. ELMURODOV,
“Vatanparvar”

TARIXNI TIKLAYOTGAN KUN

Sohibqiron bobomiz: "Mening bir bog'im borki, uzunligi o'ttiz yig'och" deganlarida haq edi. Samarqanddan tortib Buxorogacha obod bo'lmagan, bog'-rog' barpo etilmagan manzil yo'q edi. Prezidentimiz rahbarligida o'tkazilgan Respublika Ma'naviyat va ma'rifat kengashining kengaytirilgan yig'ilishida Samarqandda Amir Temurning 14 ta bog'i qayta tiklanishi haqida so'z borarkan, beixtiyor o'sha yashil maskanlar ko'z oldimda gavdalandi. Zero, bu jahd o'sha o'ttiz yig'och bog'ning debochasidir.

Xorijlik shovinistlarning O'zbekistonni bosib olish kerakligi to'g'risidagi iddaosiga jiddiy munosabat bilan boshlangan majlis davomida "Mamlakatimiz o'z taraqqiyotining yangi, yuksak bosqichiga kirayotgan hozirgi paytda bizga jaded bobolarimiz kabi G'arb ilm-fan yutuqlari bilan birga, milliy qadriyatlar ruhida tarbiya topgan yetuk kadrlar suv bilan havodek zarur"ligi va "Jaded" gazetasining tashkil etilishi yosh avlodni har qanday yot g'oyalarga va chaqiriqlarga ergashib ketavermaslik, kindik qoni to'kilgan tuproq hamda Vatan taqdiriga befarq qaramaslikka undovchi tashabbuslardan biri bo'ldi.

Madaniyat, san'at, adabiyot masalalariga batafsil o'xtalagan bu yig'ilishda ona tilimizning nufuzini oshirishga ham alohida e'tibor qaratildi. Chunonchi, ona tili va adabiyot fani o'qituvchilari ish haqiga 50 foizgacha ustama qo'shib berilishi, boshqa tilda ta'lim beriladigan maktablarda o'zbek tili darsi 2-3 barobar oshirilishi, o'zbek tili bo'yicha xalqaro fan olimpiadasi o'tkazilishi hamda g'oliblarni o'zbek tili filologiyasi yo'nalishi bo'yicha davlat granti asosida o'qishga qabul qilinishi shular jumlasidandir.

O'zbekiston xalq shoiri Abdulla Oripov "Ona tilim, sen bo'lmasang gar, men ham to'ti bo'lib qolaman" deganida qanday

iztirob va o'kinchni his etgan ekan?! Chunki ular o'z tilining tahqirlanganiga guvoh bo'lgan, o'z yurtida o'z ona tilida gapirolmay, tishini tishiga bosishga majbur bo'lganini yaxshi bilamiz. Oyni etak bilan yopib bo'lmaydi, deganlaridek o'sha davrning qoni qaynoq, nigohi o'tli ijodkorlari o'z g'oyalari ijod mahsullariga singdirib kelishgan.

Bugun ona tilimizning rivoji uchun qo'yilayotgan ushbu dadil qadamlar ham xalqimizning orzu-umidlariga mushtarakdir. Farzandlarimiz o'z tillarida gapirganda g'urur tuyishi, til imkoniyatlaridan faxrlanishi, eng muhimi, buning zamirida ajdodlari asrlar davomida to'plagan ulgidan mosuvo bo'lib qolmasligi uchun tamal toshi qo'yildi.

Adabiyot vakillariga katta imkoniyatlar eshigini ochgan kengashda mohir tarjimonlar uchun Ogahiy nomidagi xalqaro mukofot ta'sis etilishi hamda nashriyot va matbaa korxonalarini 5 yilga soliqlardan ozod etilib, boshqa imtiyozlar ham berilishi har qanday qalam ahlini ruhlantirishi tabiiy.

Kutubxonalar ishini rivojlantirish, kelgusi yildan milliy va jahon adabiyotining sara namunalari ko'p ming nusxalarda chop etish hamda mamlakatimizdagi barcha kutubxonalariga yetkazib berish lozimligi ta'kidlandi. Xalqaro maydonda o'zbek adabiyotining nufuzini oshirish uchun ko'zda tutilayotgan rejalarining barchasi kelgusida o'qimishli, ziyoli, kitobxon avlodni voyaga yetkazishga qaratilgan.

Biznes hudud shaklida "Kino parki" ochilayotgani esa ko'pchilikni quvontirib yubordi. Bilamizki, dunyo kino san'atining "Hollivud", "Bollivud" kabi kino shaharchalarida tasvirga olinishi film muvaffaqiyatini yanada oshiradi. Endi O'zbekistonda ham kino shaharchalarida

dunyoga ko'z-ko'z qilsa arziydigan ajdodlarimiz va zamon qahramonlari haqida tomshabinni ruhlantiruvchi film va ko'p seriyali kinolar ekran yuzini ko'rishi mumkinligi e'tirof etgulik tashabbuslardan biri bo'ldi.

Davlat buning uchun xususiy kino kompaniyalarga yer ajratib berishi san'atimizga bo'lgan yuksak e'tiborning bir namunasidir. Bu e'tiborning zamirida, albatta, katta mehnat va mashaqqat borligi hech birimizga sir emas. Biroq biz faqat qorin g'ami bilan yashayotgan yoki yuzaki, oldi-qochdi tasvirlar bilan qoniqadigan o'g'il-qiz ulg'aytirmoqchi emasmiz. Biz kelajak avlod oldida o'zimizni burchli his qilib, ne ishga qo'l ursak, xayrlisini va ibratlisini qilishga intiladigan, adolati yetti iqlimga ma'lum va mashhur sohibqironlar davomchisimiz.

Kengaytirilgan yig'inda ishtirok etgan borki, ushbu tadbirdan nima oldim deb o'ziga savol berishi turgan gap. Men bu savolga quyidagicha javob beraman. Bizning karvonimiz o'z yo'lidan og'ishmay, o'tmishi, qadriyatlarini unutmay, buguni va kelajagi haqida qayg'urib bormoqda. Bu karvonga hurayotganlarga ham o'z javobi bor, bo'ladi ham! Buning isbotini yig'in davomida yurtboshimizning "Mening eng kichik davomchim ham mustaqil O'zbekistonda yashashini istayman!" deya ta'kidlashidan osongina anglab olish mumkin.

Yuqorida aytib o'tilgan maqsad va takliflar atrofida birlashib, Vatan ravnaqi uchun ilgari surilayotgan mafkura yo'lida o'z hissamizni qo'shishimiz – ham fuqarolik, ham vijdon oldidagi burchimiz ekanini unutmasak bas.

Begali ESHONQULOV,
O'zbekiston Yozuvchilar
uyushmasi a'zosi



RAG'BATGA YARASHA MAS'ULIYAT

Madaniyat va ma'naviyat millat o'ziga xosligining muhim belgilaridir.

Har bir xalqning o'z adabiyoti, san'ati bor va unda o'zining milliy xususiyatlari, milliy identifikatsiyasi mujassam bo'ladi. Prezidentimiz

Shavkat Mirziyoyevning madaniyat va ma'naviyat ahli bilan uchrashuvida ta'kidlangan ko'plab masalalar ijodkorlarga ham rag'bat, ham mas'uliyat ekanini anglash mumkin.

Ijodkorning o'zini yuzaga chiqarishi, iste'dodini namoyon etishi uchun ma'lum ma'noda sharoit va imkoniyat bo'lishi zarur. Hali-hanuz ko'plab ziyolilar tomonidan bozor iqtisodiyotiga o'tish davrida ko'plab iste'dodlar o'tish davrining qurboni, ya'ni "yo'qotilgan avlod" bo'lgani kuyinib eslanadi. Iste'dodlar uchun ijod qilish emas, faqat pul topish, oila boqish, xalqona aytganda, "turmush aravasini tortish" asosiy maqsad bo'lib qoldi. Natijada yozilishi kerak bo'lgan yetuk asarlar yozilmadi. Endilikda badiiy ijod bilan shug'ullanish uchun zarur shart-sharoit yuzaga kelgan.

Ma'ruzada har yili eng yaxshi badiiy asarlar yaratish, tarjima qilish uchun ijodiy buyurtmalar berilib, muallif va tarjimonlarga munosib qalam haqi to'lanishi ta'kidlandi. Bu, albatta, yaxshi. Ammo asarning badiiy saviyasi yuksak bo'lishi ijodkorning o'ziga

bog'liq. U o'ziga nisbatan talabchan bo'lishi, har qanday asarni taqdim etishdan hayo qilishi ijodkorning vijdonini ko'rsatadi. Asosiy maqsad yuqori gonorar olish uchun yozilgan ijod mahsuli na millatga, na adabiyotga manfaatli bo'ladi. "Har bir ishdan foyda kutganingda, uni bajarishda qiyinchiliklar va ikkilanishlar paydo bo'lsa, mashaqqati ozroq tomoniga kuch ber, qiyinchiligidan ezilmaslik chorasini ko'r... Nodon o'g'itida xato bo'lishi muqarrardir; dushman nasihatida aldov bo'lishi shubhasizdir. Unisidan aldanma va bunisiga o'zingni aldatma", deb yozadi hazrat Alisher Navoiy. Shunday ekan, jamiyatda ijodkor vijdoni shakllanishi lozim.

O'zbekiston nomini dunyoga tanitish uchun nafaqat sport orqali, balki adabiyot va kino orqali ham erishish mumkinligini ijodkorlar qalban his etmog'i, maqsadni shu nuqtaga yo'naltirmog'i har tomonlama

to'g'ri bo'ladi. Zero bugun dunyoning millionlab kitobxonlari tomonidan o'qiladigan, har bir kitobi butun dunyodagi muxlislari tomonidan kutiladigan Xaruki Murakami nomi Yaponiyani, Paulo Koelo nomi Braziliyani yanada dunyoga mashhur qilayotgani sir emas. Masalan, Koeloning birgina "Alkimyogar" asari 81 tilga tarjima qilingan. Ammo Koeloning ijodi faqat shu asar bilan chegaralanib qolmagan. Yozuvchining kitoblari 350 millionga yaqin nusxada sotilgan. Koeloning kitoblari sotilgan pul miqdori horror janrining qiroli bo'lmish Stiven Kingniki bilan bir xil. 2017-yilda Koelo dunyoning eng nufuzli yozuvchilari ro'yxatida 2-o'ringa sazovor bo'ldi. U birinchi o'rinni "Garri Potter" muallifi Joan Roulingga boy bergan, xolos.

Yoki kino sohasida Janubiy Koreya kino sanoati butun dunyoni zabt etmoqda. "Kalmar o'yini" seriali dunyoga mashhur bo'ldi. Aslida bu o'yin koreys milliy o'yini bo'lib, endilikda ushbu serial ortidan koreys madaniyatining bir bo'laki dunyoga targ'ib qilindi. Yoki turk kinoijodkorlari tomonidan yaratilayotgan seriallar dunyo bo'yicha eng yuqori reytinglarda turadigan Lotin Amerikasi seriallarining nufuzini biroq pasaytirib qo'ydi. Turkiya esa allaqachon o'z seriallarining eksport hajmi bo'yicha dunyoda AQShdan keyingi ikkinchi o'rinni egallab turibdi. Turkiya seriallaridan keladigan daromad bugungi kunda yiliga 7 mlrd. yevroni tashkil etmoqda. Zamonaviy Turkiya o'z kinematografiyasini xalqaro maydonga ta'sir o'tkazishning kuchli vositasi deb biladi. Turk tilining xalqaro miqyosda kattaroq nufuzga ega bo'lish istagi ham buning asosiy sabablaridan biridir. Demak, adabiyot va kino san'atiga investitsiya kiritish orqali millat nomini, madaniyati va san'ati dunyoga mashhur qilish, shu bilan birga ijodkor yoshlarda ulkan motivatsiya hosil qilish mumkin.

Ijtimoiy buyurtmalar nomi buyurtma bo'lgani bilan kreativlik, zamonaviylik

va badiiy saviya uning asosiy mezonini bo'lmog'i lozim, deb o'ylayman. Bugun zamonaviy adabiyotning urf bo'lgan yo'nalishlari: konseptualizm, postmodernizm, fusunkor realizm, fentezi, kiberpank, intellektual adabiyot, shuningdek grafik romanlar bo'lmish komiks, elektron epistolary janr, latifalar, sketchlar, lingvistik tajribalar va boshqalarda ifodalangan zamonaviy folklor ham moda adabiyotiga aloqador janrlarda asarlar yozish orqali milliy adabiyotimizda yangi davrni boshlash mumkin. Bugungi adabiyot hayotning zamonaviy ritmiga, o'quvchining yangi voqelikni idrok etishiga qarab moslashadi va yangilanadi. Zamonaviy adabiyot rang-baranglik talab etadi. Zamonaviy xorij adabiyotining eng rivojlangan yana bir yo'nalishi bu ilmiy-fantastik yo'nalishdir. Bu yo'nalish kompyuter o'yinlari sanoati bilan yaqin, samarali hamkorlikda amalga oshirilmoqda. Zamonaviy fantastika adabiyotining ko'plab yangi janrlari paydo bo'ldi, ular orasida kiberpank, stimpunk, horror, kosmik opera, shahar fentezi, postapokalipsis, gotik roman va texnofentezi kabi janrlarni sanash mumkin. Bular barcha ijodkorlar uchun sinab ko'rinishi, tajriba qilinishi foydali bo'lgan ochilmagan qo'riqlardir.

Ma'ruzada Prezident Shavkat Mirziyoyev ulug' ma'rifatparvar Ibrat domlaning "Millatni kim isloh etar? Ulamo g'ayrat etkanda millat, albatta, isloh topur", degan hikmatli so'zlarini bejiz eslamadi. Millat ziyolilari, yozuvchi va shoirlari, kino va teatr sohasi vakillari mazkur imkoniyatdan unumli foydalanishi, millat ma'naviyatiga o'zining munosib ulushini qo'shishi ularning ma'naviy burchidir.

Xurshid SEROBOV,
Ijtimoiy-ma'naviy tadqiqotlar
instituti ilmiy xodimi

O'zbekiston Respublikasi Mudofaa vazirligi huzuridagi Jamoatchilik kengashi harbiy xizmatchilarning intellektual darajasini, jangovar va vatanparvarlik ruhini hamda jamiyatda harbiy xizmat nufuzini oshirish, o'sib kelayotgan yosh avlodni harbiy-vatanparvarlik ruhida tarbiyalash ishlariga salmoqli hissa qo'shib kelmoqda.

JAMOATCHILIK KENGASHIDA YIL SARHISOBI



Qurolli Kuchlar akademiyasining Situatsion markazida Mudofaa vazirligi huzuridagi Jamoatchilik kengashining 2023-yil yakunlari hamda O'zbekiston Respublikasi Qurolli Kuchlarining 32 yilligiga tayyorgarlik ko'rish va uni o'tkazish masalasiga bag'ishlangan umumiy videoselektor yig'ilishi o'tkazildi. Unda Mudofaa vazirligi,

mutaxassislar tomonidan kun tartibidagi besh muhim masala, ya'ni Jamoatchilik kengashining joriy yil yakuni yuzasidan sarhisobi, Prezidentimizning "O'zbekiston Respublikasi Qurolli Kuchlari tashkil etilganligining 32 yilligini hamda Vatan himoyachilari kunini nishonlashga tayyorgarlik ko'rish va o'tkazish chora-

kengashining samarali faoliyatini yanada oshirish, xalq va armiya o'rtasidagi ahillik va ishonch tuyg'ularini mustahkamlash, mamlakatimiz mudofaa va xavfsizlik masalalarida olib borilayotgan davlat siyosatini keng ommaga chuqurroq singdirish kabi muhim vazifalarni o'zida mujassam etgani yig'ilish



Jamoatchilik kengashi va uning hududiy bo'linmalari a'zolari, ishchi organi rahbarlari va yetakchi mutaxassislari, harbiy okrug qo'shinlari qo'mondonlarining tarbiyaviy va mafkuraviy ishlar bo'yicha o'rinbosarlari ishtirok etishdi.

Mudofaa vazirining o'rinbosari general-mayor Hamdam Qarshiyev, Oliy Majlis Qonunchilik palatasi deputati, Jamoatchilik kengashi raisi Iqbol Mirzo va boshqa mas'ul

tadbirlari to'g'risida"gi farmoyishi ijrosi, joriy yilning 11-oktabr kuni Prezident raisligida o'tkazilgan yig'ilishda belgilangan vazifalar, shuningdek Respublika ma'naviyat va ma'rifat kengashining navbatdagi yig'ilishida belgilangan chora-tadbirlar ijrosi hamda Jamoatchilik kengashining 2024-yilgi faoliyat rejasini tasdiqlash kabi masalalar ko'rib chiqildi.

Ushbu tashabbus va chora-tadbirlar zamirida avvalo Jamoatchilik

qatnashchilari tomonidan e'tirof etildi.

Muzokaralar davomida Jamoatchilik kengashi komissiyalari raislari hamda hududiy bo'linma raislarining hisobotlari, kengash a'zolarining fikr-mulohazalari tinglandi.

Kun tartibiga qo'yilgan masalalar, taklif va tavsiyalar o'rganilib, tegishli qarorlar qabul qilindi.

Kapitan Bobur ELMURODOV



YOSH HARBIYLAR FORUMI

Mamlakatimizda yoshlarga oid davlat siyosatini amalga oshirish, jumladan demokratik islohotlarni yanada chuqurlashtirish jarayonlarida yoshlarning faol ishtirokini ta'minlash, yuksak ma'naviyatli, mustaqil va erkin fikrlaydigan, zamonaviy ilm-fan yutuqlarini puxta o'zlashtirgan, sog'lom e'tiqodli, har tomonlama barkamol avlodni voyaga yetkazishga alohida e'tibor qaratib kelinmoqda.



Aniq chora-tadbirlar rejasiga muvofiq, yoshlarda ona yurt taqdiri uchun mas'uliyat tuyg'usini mustahkamlash, ularni o'z kasbiga sadoqatli va har tomonlama yetuk kadrlar etib tarbiyalash bo'yicha ta'lim muassasalari, mehnat jamoalari va mahallalarda yoshlar va "og'ir" toifadagi yoshlar hamda milliy armiyamiz saflaridagi yosh avlod vakillari bilan harbiy-vatanparvarlik yo'nalishidagi tadbirlar izchillik bilan olib borilmoqda.

O'zbekiston Respublikasi Qurolli Kuchlari akademiyasida Mudofaa vazirligi qo'shinlarida "Yoshlarimiz ma'naviyati va intellektual salohiyatini oshirish, ularni vatanparvarlik ruhida tarbiyalashning dolzarb masalalari" mavzusida tashkil etilgan "Yosh harbiylar forumi" ayni shu masalalarga qaratildi. Unda videoselektor tarzida harbiy qism va muassasalar vakillari ham ishtirok etdi.

Forumda yosh harbiy xizmatchilarning harbiy sohaga oid innovatsion g'oyalari va ishlanmalari ko'rgazmasi, yosh harbiy adib va shoirlarning

kitoblari taqdimoti, "Yoshlar kutubxonasi" hamda "Mard askarga sovg'a" rukni ostida nashr etilgan badiiy adabiyotlar ko'rgazmasi bo'lib o'tdi.

Tadbirda mudofaa vazirining birinchi o'rinbosari – Qurolli Kuchlar Bosh shtabi boshlig'i general-mayor Shuxrat Xalmuxamedov, O'zbekiston yoshlar ittifoqi markaziy kengashi raisi Temurbek Poyonov, Mudofaa vazirligi harbiy qism va muassasalaridagi O'zbekiston yoshlar ittifoqi boshlang'ich tashkilot yetakchilari hamda xalqaro sport musobaqalari g'oliblari, yosh harbiy xizmatchilar, "Vatan tayanchi" bolalar va o'smirlar harbiy-vatanparvarlik harakati a'zolari, Jahon iqtisodiyoti va diplomatiya universiteti talabalari ishtirok etdi.

Forum O'zbekiston Respublikasi Davlat madhiyasi bilan boshlandi. Mudofaa vazirining yosh harbiylarga yo'llagan murojaatini general-mayor Shuxrat Xalmuxamedov o'qib eshittirdi.

Forum davomida Mudofaa vazirligi harbiy qism va muassasalaridagi boshlang'ich tashkilotlar tomonidan 2023-yilda amalga oshirilgan ishlar

hisoboti tinglanib, qo'shinlarda joriy yilda yoshlarga oid davlat siyosatini amalga oshirish yuzasidan tayyorlangan videorolik namoyish etildi. Shuningdek, O'zbekiston yoshlar ittifoqi markaziy kengashi raisi Temurbek Poyonov hamda o'z mutaxassisligi bo'yicha yuqori cho'qqilarga erishgan yosh harbiy xizmatchilar ham so'zga chiqdilar.

Forumda Qurolli Kuchlar Bosh shtabi boshlig'i general-mayor Shuxrat Xalmuxamedovning yosh harbiylar bilan jonli savol-javob tarzidagi muloqoti ham bo'lib o'tdi.

Tadbir yakunida buyuk ajdodlarimiz Amir Temur, Zahiriddin Muhammad Bobur, Jaloliddin Manguberdi, To'maris hamda jadidchilik harakati namoyandalarning hayoti va ijodiga bag'ishlangan badiiy chiqishlar hamda iste'dodli yosh harbiy xizmatchilar tomonidan tayyorlangan konsert dasturi namoyish etildi.

**Katta leytenant
Islomjon QO'CHQOROV,
"Vatanparvar"**

YO'RIQCHI-SERJANTLAR TAJRIBA ALMASHDI

Qurolli Kuchlar akademiyasida Mudofaa vazirligi qo'shinlarida ilk bor yo'riqchi-serjantlar forumi o'tkazildi.


Tantanalı tarzda boshlangan forumda mudofaa vazirining jangovar tayyorgarlik bo'yicha o'rinbosari polkovnik Qodir Tursunov Yangi O'zbekiston zamonaviy armiyasi saflarida bo'linmalarining jangovar va intellektual salohiyatini yuksaltirish, harbiy intizom va sog'lom muhitni ta'minlashda malakali yo'riqchi-serjantlarning faoliyati muhim o'rin tutishini ta'kidladi. Shuningdek, Mudofaa vazirligi qo'shinlarida bo'linmalarining jangovar tayyorgarlik darajasini oshirish bo'yicha yo'riqchi-serjantlar faoliyatini rivojlantirish yuzasidan istiqboldagi chora-tadbirlar xususida to'xtaldi.

Videokonferens-aloqa shaklida o'tkazilgan tadbirda hududlardan harbiy okrug qo'shinlari qo'mondonlari, ularning jangovar tayyorgarlik bo'yicha o'rinbosarlari, harbiy qism komandirlari va yo'riqchi-serjantlar tarkibi ishtirok etdi.

Forumning kun tartibidan bir-biridan qiziqarli tadbirlar o'rin oldi. "Jangchining ruhiy barqarorligini ta'minlashda jangovar psixologik mashqlarning o'ri", "Mudofaa vazirligi qo'shinlaridagi yo'riqchi-serjantlarga yaratilgan imkoniyatlar va mavqeyini oshirish bo'yicha istiqboldagi tadbirlar" singari sermazmun mavzulardagi chiqishlar shular jumlasidan.



III darajali serjant Olim BERDIYEV



– Bugun harbiy okruglar kesimida hamkasblarimiz bilan xizmat faoliyatimizdagi ilg'or tajriba va o'zaro fikr almashdik, – deydi forum ishtirokchisi III darajali serjant J. Jumayev. – Ushbu forum komandirlarning asosiy yordamchisi sifatida yo'riqchi-serjantlar uchun yaratilgan sharoit va imkoniyatlardan unumli foydalanib, istiqbolli rejalarini belgilab olishimizga turtki beradi. Qolaversa, jangovar tayyorgarlik tadbirlarini takomillashtirish, yoshlarni yuksak vatanparvarlik ruhida tarbiyalashdagi mas'uliyatimizni yanada oshirishga xizmat qiladi.

Forum yakunida Mudofaa vazirligi qo'shinlarining jangovar tayyorgarlik tizimida qo'llanilayotgan zamonaviy vosita va usullar ko'rgazmasi namoyish etildi hamda psixologik tayyorgarlik markazida interfaol treninglar o'tkazildi.

**Katta leytenant
Dilshod RO'ZIQULOV,
"Vatanparvar"**

“Xalqimiz jadid bobolarimiz ko’rsatgan yo’ldan og’ishmay borishi kerak. Chunki ularning g’oya va dasturlari Yangi O’zbekistonni barpo etish strategiyasi bilan har tomonlama uyg’un va hamohangdir”.

Shavkat MIRZIYOYEV,
O’zbekiston Respublikasi Prezidenti

“Askarsiz millat jonsiz gavda hukmidadir. O’zining yerlik xalqidan askari bo’lmagan bir yurt qo’riqchisiz bir istehkom kabidir. Askarlik bir millatning hayot-mamot masalasini hal qilish uchun zo’r ro’llar o’ynaydurg’on bir kuchdir. Har bir yengish va yengilishning boisi askardir.”



Hoji MUIN

YOSHLAR!

YURTNING UMIDI

YOLG’UZ SIZGADUR!



Turkistonning taraqqiyparvar zotlaridan biri – shoir, dramaturg, tarjimon, muallim, muxbir... Hoji Muin salafkari kabi “Askarlik, maorif, til, adabiyot, ziroat, tijorat va sanoyi... Hayoti ijtimoiyimizda lozim bo’lg’on bu narsalarning barchasi hozirda bizda bormi?” deya savol qo’yadi 1918-yil “Mehnatkashlar tovushi” gazetasida chop etilgan “Bizga nima kerak?” nomli maqolasida. Va “siyosiy ahvolning” jadal o’zgarishi “fursat bermas”ligi ayon bo’lsa-da, “zamonni g’animat bilib”, eng zarur “tadbir va choralarg’a” kirishish lozimligini qat’iy ta’kid etadi. “Hozirgi vazifamizg’a qarag’onda bizga eng avval, askar kerakdir. Chunki hozirgi doxiliy sho’rish va inqilob xorijiy dushmanlarning tajovuzidan ortiq bizga qarshi xatarli bir holg’a aylanmaqdadurki, bu sho’rishdan Vatan va Hurriyatni qutqarib olmoq uchun askariy zo’r bir quvvatg’a molik bo’lmog’imiz mutlaqo lozimdir”, deydi. Mazkur maqolaga quyidagi so’zlar bilan nuqta qo’yiladi:

“Ey Turkiston ishchisi! Oyoqg’a tur! Dushmanlaringni bos! Yurtingni saqla! Ey turkistonli turk o’g’li! Yarog’ingni ol! Yovingni ot! Hurriyatingni saqla!”

Turkistonlilar o’z yo’lidan adashib, Turkiston g’orat etilgan yillarda tug’ilgan Hoji Muinning ijtimoiy hayotdagi faolligi 1901-yil muborak Haj safaridan qaytganidan keyin boshlanadi. She’rlariga “Nahif” (“Ojiz”), “Mehriy” taxalluslarini qo’ygan yosh shoirga Mahmudxo’ja Behbudiy kuchli ruhiy va g’oyaviy ta’sir o’tkazadi. Bu ta’sir tufayli u arosatda qolgan millat va mamlakat ishlarida o’zini namoyon etib, keyinchalik shoir, adib, muallim, ma’rifatchi, bir so’z bilan aytganda, taraqqiyparvar sifatida taniladi.

Hoji Muinning 1917-yil “Hurriyat” gazetasida e’lon qilingan “Sho’royi islomiya va saylov” nomli maqolasida jamiyat hayoti, tarqoqlik sababi jadidlarning ahvoli yorqin ifoda etilgan. Unda Samarqand shahri dumasiga saylov voqeasi bayon qilingan. Bu saylovda musulmonlar “Sho’royi islom” va “Zahmatkashlar ittifoqi” nomli ikki firqaga bo’linib, birinchisi “boy, ulamolar”, ikkinchisi yangilik istagan yoshlardan iborat edi. “Ko’b boylar va mullolar” “zahmatkashlar” haqida tuhmatlar qilib, ularni “jadidchi va kofir”ga chiqaradilar. Hatto mahallalarda “zahmatkashlar va yoshlar”ga qarshi targ’ibot, fitnalar uyushtiradilar. Muallifning qat’iy aytishicha, “bechora zahmatkashlar va ular tarafdorlari”ning ko’pchiligi jismonan mahv etilib, “bir nechasi o’lum to’shaki”ka mixlanadi. “Munday yirtqichlik va vahshiylikni ko’rgan bechora xalq birdan qo’rqushib” qoladi. Va tabiiy ravishda “Sho’royi islom”ga ovoz beradi. Afsuslanarli bu voqeaga “hukumatning ham bir oz tadbirsizligi sabab bo’ldi. Chunonchi, hukumat saylov to’g’risida shuncha muxolifat va nizo borlig’ini bilib turib, saylov kunida biror tadbir qilmadi. Ya’ni har uchastkada aqalli 20 nafar askar qo’ymadi.

...Har nima bo’ldi, endi o’tdi. Bu voqeaning bosh sababi “Sho’royi islom”dur, deydi Hoji Muin.

Bu yigirmanchi asr boshlaridagi qizillar va oqlarning Turkistonni tortqilashlaridan bir ko’rinish.

1908-yilda alifbo darsligini yozgan, ham eski, ham yangi usuldagi maktablarda muallimlik qilgan, “Hurriyat”, “Mehnatkashlar o’qi”, “Mehnatkashlar tovushi”, “Zarafshon”, “Ovozi tojik”, “Tayoq”, “Mashrab”, “Mushfiqiy” nomli gazeta va jurnallarda ishlagan Hoji Muinning hayoti bugungi kun ziyolisi uchun ibratlarga to’la bir ko’zguvdir. Unga qaragan ziyoli o’zini ko’rishi mumkin.

“Man burung’i zamonda ilm va madaniyat o’chog’i bo’lg’onim uchun dunyoning ma’mur va mas’ud o’lkasidan sanalar edim. Shuning uchun ediki, hozirda qo’ynimdag’i (xarobazordardan iborat bo’lg’on) Samarqand – “Samarqand firdavsmonand” atalar edi. Chin o’g’lonlarimdan bo’lg’on u botur, u jahongir Temur davrida ko’rg’on umroniyat va baxtiyorlig’im qiyomatg’acha esimdan chiqmas.

Oh! Na bo’ldikim, so’ngg’i bolalarim ilm va maorifdan uzoqlashdilar. Otabobolarining yo’llaridan chiqdilar. Nega otalaridan meros qolg’on maorifni tashlab jaholatni ixtiyor etdilar?”

Bu o’tli so’zlar 1917-yil “Hurriyat” gazetasining 10-noyabr sonida “Yurt qayg’usi” ismi bilan chop etilgan. “Turkistonning fig’oni” mamlakat yoshlariga chorlov bilan yakun topadi: “Ay suyukli o’g’lonlarim, uyg’oningiz!

Uyg’oningiz! Tong otdi, endi uxlamog’ harom!.. Qiyomat qo’pdi, endi tek turmak mahol! Ana tinglangiz! Hozirgi madaniyatning suri Isrofil, oxir zamonning muazzini na der? Derki, “Hayya alal falah!”

Fitratning “Munozara” asari tarjimoni, “To’y”, “Eski maktab – yangi maktab”, “Ko’knori”, “Mazluma xotin” pyesalari muallifi Hoji Muin 1938-yil 24-yanvarda hibsga olinib, NKVD qoshidagi uchlik hukmi bilan 10 yilga qamaladi. 1942-yil 27-iyulda Rossiyaning Perm viloyati Solikamsk shahrida azob-uqubat ichida vafot etadi.

Hoji Muinning bundan 100 yil narida, 1920-yilda “Mehnatkashlar tovushi” gazetasining 15-fevral sonida e’lon qilingan “Yoshlar! Yurtning umidi yolg’uz sizgadur!” nomli maqolasini o’qib ko’ring. Jadidlardan keyingi o’nlab yillarda kechgan voqealar ko’z o’ngingizda jonlansa, shuning bilan barobar bu kungi yoshlar uchun ham qaynoq bir xitob bo’lsa, ne ajab?!

“Yoshlar! Yurtning umidi yolg’uz sizgadur!”

Turkistonning xususan boshindan o’tkardigi fojealarni bir-bir sanasak, necha jild kitob bo’ladir va bu fojealarning boshlicha sababi bilimsizlik, jaholat, muhokamasizlik, bir-birovga sui zan (badgumonlik), bir-birovga ishonmaslik, biron kattaroq yo mo’ysafid odam har nima desa ani Xudo tarafidan kelgan vahiydek bilmaklikdan iborat edi. Nodonligimiz shu darajadadirki, asrlardan beri islom olami, Sharq dunyosining boshig’a qanday falokatlar keldi, bu falokatlarning sababi kimlar va nima edikini bilmaymiz. Holo ham bilmaslikimizga davomat qilmoqdamiz. O’tgan asrlarni bir yoqqa qo’yayluk, yolg’uz shu keyingi to’rt-besh yilda Turkistonda nimalar bo’ldi, xabarimiz yo’q.

Yoshlar! Ay, yosh yigirmadan oshgan birodarlar, sizlar bundan buyon mundaqa ahmoqlarning so’zlarig’a quloq solmang. Bu fursatlarni g’animat bilib, ilm yo’lig’a yuguring!

Vataningiz, bu bekas Vataningizning dardiya davo bo’ladurgon er va olim yigitlar bo’lmoqqa cholishing!

O’tgan yil shundaqa og’ularg’a aldanib Vatandan qochg’an, yo’lda ushlanib, turmalarga qamalgan bir necha birodarlaringiz bu yil sizning jamiyatingizning ishlikli eng faol yigitlaridandir. Ularning eslariga o’tgan yildagi voqea tushsa qizarib, uyolalar, u ishlarga sabab bo’lg’onlarga nafrat bayon qilalar.

So’zning qisqasi: bizga nodon odamlarning maslahatidan zarardan boshqa narsa tegmaydur. U odamlar mundan so’ngra aqlg’a ham kelmaydurlar. Siz o’z pok vujudingiz, g’arazsiz ko’nglingiz bilan ish qiling!

Yoshlar! Yurtning umidi yolg’uz sizgadur!



MARDLAR

JASORATI MANGU YASHAYDI

Bir yigit o'sib-ulg'ayib, kamolotga yetishida ota-onaning, yurtning hissasi katta. Albatta buni oqlash har bir mard o'g'lon zimmasidagi iftixorli mas'uliyat. Vatanni sevis, har qarich yerini asrab-avaylash, hatto shirin jonini fido qilish yuksak g'urur, o'chmas jasorat.

Jang maydonida, Vatan mudofaasida jangchining har tomonlama mukammal qurollanishi g'oliblikning asosiy omilidir. Ammo qanchalik tish-tirnog'igacha qurollangan bo'lishidan qat'i nazar jangchining muvaffaqiyat qozonishi diyoriga bo'lgan muhabbati bilan bog'liqdir. Muzaffar bo'lib, sharafli nom qoldirishga ota o'g'iti, ona mehri, yurt ishonchi bilan erishiladi va bu jangchiga yuksak ishonch bag'ishlaydi. Har qanday g'ov-g'animga yer tishlatadi. Vatanga muhabbatning har qanday zamonaviy quroldan qudratligi jangchining ko'zidagi ishonchida ko'rinadi.

Tarixan Turon zamini g'animga Vatanni qanday sevishni amalda ko'rsatgan farzandlari bilan tillarda dostondir. Chingizxon istilosi davrida umrining oxirigacha matonat bilan yurtini himoya qilgan Jaloliddin Manguberding mardligi dovruq qozongan. Ayniqsa, Sind daryosi bo'yidagi jangda Chingizxon qo'shin to'plab, Jaloliddin Manguberdiga qarshi shaxsan o'zi otlangan. Jaloliddin Manguberdi Chingizxon qo'shinining ilg'orini tor-mor keltiradi va

kuchi ozligi sababli Sind daryosi tomon chekinadi. Chingizxon qo'shini Jaloliddin Manguberding daryodan o'tishga imkon bermay, qurshab oladi. 1221-yil 25-noyabrdagi imkoniyatlari tengsiz jangda mag'lubiyatga uchragan Jaloliddin Manguberdi to'rt ming jangchisi bilan 18–20 metrlik jarlikdan Sind daryosiga sakrab, uning o'ng sohiliga suzib o'tadi. Chingizxon Jaloliddinning bu jasoratidan hayratda qolib, o'z o'g'illariga qarab: "Ota o'g'li mana shunday bo'lishi lozim!" degan.

Kezi kelganda or-nomus, Vatan sha'ni uchun kurashib g'animga ruhan yenggan ajdodlarimiz bu zaminda oz emas. Shu mavzuda so'z ketganda Shayx Najmiddin Kubroning chingiziy yovga qarshi kurashi har bir kishi uchun namunadir. Chingizxon bosqini davrida Shayx Najmiddin Kubro nomi dunyoga tanilgan edi, bunga yaqqol dalil, Chingizxon 76 yoshli Shayx Najmiddin Kubrodan o'z yaqinlari va shogirdlarini olib, shaharni tark etishni so'ragan. Lekin Najmiddin Kubro shahar himoyachilariga qarata iltijo bilan "Yo Vatan, yo sharafli o'lim!" deb xitob qiladi. Vatanni manfaat uchun sevmagan insonlar ko'rsatgan sadoqat va jasorat necha asrlar o'tsa-da, mangu yashaydi.

Dunyo tarixida buyuk sarkarda nomi bilan dovruq qozongan sohibqiron Amir Temur buyuk davlatchilik asoschisi sifatida Turon zaminida o'z hukmronligini o'rnatguncha qanchadan qancha jang-u jadallarni boshidan o'tkazdi. Amir Temurning qilichiga "Kuch adolatda" deb yozilgani bejiz emas. Amir Temur har bir jangida o'z askarlariga mardlikda namuna ko'rsatgan, odillikda adolatni namoyon qilgan. O'sha davrdagi mo'g'ul hukmdor bosqinchilarining boshboshdoqligidan aql-idroki, mohirona jang uslublari orqali Vatan yerlarini yovdan tozaladi. O'z saltanatiga asos soldi. Davlat boshqaruvida ham odillik tamoyillariga qat'iy amal qildi.

Sohibqiron biror davlat bilan jang qilishidan oldin sulh tuzishni taklif etgan, ya'ni qon to'kilishini ruhan istamagan. Pand-nasihat, saltanat boshqaruvi ilmiga to'la bo'lgan dunyoga mashhur "Temur tuzuklari"da "*Davlat ishlarining to'qqiz ulushini mashvarat, kengash va tadbir, qolgan bir ulushini qilich bilan bajo keltirdim*", deb ta'kidlagani bunga yaqqol misoldir. Bu esa nechog'li jangovar sarkarda bo'lmasin, sulhni afzal ko'rgani uning kuchli aql-idrok sohibi ekanidan dalolat beradi.

Taraqqiyot cho'qqisiga chiqqan Yevropa davlatlari Amir Temurning o'sha davrda olib borgan dunyo siyosiy maydonidagi roldan hozirgacha minnatdorligi Turk sultoni Boyazid Yildirimning Yevropaga bosqinchilik yurishlarini to'xtatgani bilan baholanadi. Anqara jangida Amir Temur Boyazid Yildirimni mag'lub qiladi, bu esa butun Yevropani Turk sultoni bosqinidan saqlab qoladi. Amir Temur har bir yurishiga puxta tayyorgarlik ko'rgani tufayli janglarda g'alaba qozongan. U hech qachon biror

urushni ko'r-ko'rona, faqat harbiy omadga ishonib boshlamagan. Har bir harbiy yurishga jiddiy, aniq hisob-kitob asosida, uzoq yillar davomida hozirlik ko'rgan. Masalan, u "Anqara jangida Boyazid ustidan qozongan g'alabasiga aql bilan erishdi", deb fikr bildirgan Turkiya Respublikasi asoschisi Mustafo Kamol Otaturk. Albatta, Amir Temurning ensiklopedik ilm sohibi, davlat boshqaruvida odil, jangda jasur bo'lganligi dunyoni hozirgacha lol qoldirib kelmoqda.

Tinchlik — oliy ne'mat, uning qadriga yetish har birimizning burchimiz. Yurtimiz sarhadlarini ko'z qorachig'idek qo'riqlayotgan mard o'g'lonlar qahramondir. Hozirgi kunda el-yurt osoyishtaligini ta'minlab kelayotgan dovyurak o'g'lonlardan bir guruhi so'nggi ikki yilda Amerika Qo'shma Shtatlarida o'tkazilgan "Eng ilg'or jangchi", Buyuk Britaniyada "Kembriya patruli", Pokistonda "Jamo' ruhi" musobaqalarida faxrli 1-o'rinni hamda yaqinda Janubiy Koreyada bo'lib o'tgan "Xalqaro ilmiy jangovar tayyorgarlik" musobaqasida mutlaq g'oliblikni qo'lga kiritgani buning yaqqol misolidir. Koreya Respublikasida maxsus bo'linmalar o'rtasida bo'lib o'tgan "I xalqaro ilmiy jangovar tayyorgarlik" musobaqasida kuchli bilim va amaliy ko'nikmalarni ko'rsatib, umumjamo' hisobida 1-o'rinni egallagan o'g'lonlar dunyo sahnida hech kimdan kam emasligini isbotlab kelmoqda. Albatta, bu zaminning yorqin tarixi, duogo'y onalari, Spitamen, Jaloliddin Manguberdi jasorati, Shayx Najmiddin Kubro sharafi, buyuk sarkarda Amir Temur tuzuklarini o'rganib, kamolotga yetgan bu farzandlar qudratli qurol bilan qurollangan.


Har qanday tinch yurt rivojlanib, taraqqiy topishining omillaridan biri xotirjamlikdir. Ya'ni fuqarolarning tinchlikdan ko'ngli to'qligi ularning Vatan rivojiga hissa qo'shishini ta'minlaydi. Bunday zalvarli ishni mard o'g'lonlar har qanday qiyinchilikka qaramay, astoydil ado etib kelmoqda. Shuning uchun ruhan yetuk, jismonan baquvvat, fikri teran yigitlar elimiz tayanchidir.

Hozir dunyoda zimdan ketayotgan qurollanish poygasida har bir davlat o'z armiyasini zamonaviy qurol bilan qurollantirishga intilmoqda. Jangchining qanchalik kuchli qurollangani jang taqdiriga ta'sir ko'rsatadi. Ammo irodasiz askar eng so'nggi zamon talabiga javob beradigan qurol bilan qurollansa-yu, unda Vatanga mehr, ota-onaga hurmat, yorga ishq qalbida jo'sh urmasa, xalqini sevmasa, kimlardir tomonidan boshqariladigan robotdan farqi qolmaydi. Aksincha, elini ardoqlaydigan, tinchlikning qadrini biladigan, ham jismonan, ham ruhan komillikka erishgan o'g'lonlar har qanday vaziyatda Vatanni himoya qilib, ajdodlarga munosib shonini ko'rsatadilar.

Temurbek TUROBOV,
Toshkent davlat
sharqshunoslik universiteti
xalqaro jurnalistika
yo'nalishi talabasi

MUTOLAA

HAYOTIY EHTIYOJDIR



Harbiy qism va muassasalarda tashkil qilingan kitob yarmarkalarini kuzatganman, gazetamizda bu haqda xabarlar e'lon qilingan. E'tiborli tomoni shundaki, ayni o'sha kunlari harbiy qism va muassasalar eshiklari harbiy xizmatchilarning oila a'zolari uchun ochiq bo'ladi. Bu manzarani chetdan kuzatsangiz, asalari uyasiga o'xshaydi, bolalarning g'uvullashi, kitob tanlashlari ko'zni quvontiradi. Ko'pchilik o'zi va farzandlari uchun anchagina kitoblar xarid qiladi. Ular orasida birorta kitob xarid qilmaydiganlar ham bo'ladi. Onasiga umidvor tikilgan nigohlarga ham guvoh bo'lganman.

2023-yil ham nihoyasiga yetib qoldi. Kitoblar targ'ibotini deyarli to'xtatganimiz yo'q. Bugun biror asar tavsiya qilmoqchi emasmiz, bugun kitob va kitobsevarlik haqida so'z aytamiz. Bu borada aytadigan gaplarimiz ko'p, ammo... tinglovchilar bormikan?!

O'QISH

Siz ham endigina o'qishni o'rganayotgan bolaning o'qishini kuzatganmisiz? Butun vujudi bilan, yurakchasi ko'zlarida aks etib, chuqur jiddiyat bilan yutib, nafas olishlari eshitilib, berilib o'qiyotgan go'dak... Ana shu ishtiyoqni qanday saqlab qolish mumkin? Yoki qanday rivojlantirish mumkin? Bu bola hayotidagi eng, eng muhim lahzalardir! Ayni shu lahzalar rag'batlantirib, o'zingizni bolangiz o'rniga qo'yib ko'ring, u bir parchagina matnni o'qimadi, u ulkan bir kitobni o'qib chiqqandek bo'ldi. Taassurotlarini so'rang, telefonda shu go'dak uchun biroz bo'lsa ham uzoqlashing! Yana bir nimalar o'qib berishini so'rang, biror yilcha o'tib-o'tmay, o'zi kitob qidirib qoladi. Shunda ham qanday asar o'qiyotgani bilan qiziqing, asarning eng ta'sirli joyini so'rang. Ana shunday qilib asta-sekin hur fikrli inson shakllanadi. Har qanday g'oyalarga ko'r-korona ergashib ketavermaydigan, olamga savoli bor inson ulg'ayadi.

SAFARDA

Termizdagi harbiy qismlardan birining kutubxonasida askarlar tanlovga tayyorgarlik ko'rayotgani ustidan chiqdik. O'n chog'li bir-birdan ko'rkam o'g'lonlar. Tabiiy, ular bilan suhbatimiz kitoblar haqida bo'ldi. Ular shunday savollar berdi:

– Opa, shu kunga qadar nechta kitob o'qigansiz?
 Bunaqa savolni kutmagan edim.

– O'qigan kitoblarimni sanash xayolimga ham kelmagan ekan. Chunki kitob o'qish men uchun hayotiy ehtiyoj. Xuddi yemak-ichmakka, kiyinmakka, atrofimdagi olamni anglashga bo'lgan ehtiyojim kabi ehtiyoj. Nurga, yorug'likka bo'lganidek insonning kitoblarga ehtiyoji bor.

– Jahon adabiyotidan qaysi yozuvchilarni tavsiya qilasiz?

– Bu savolga sizning qiziqishlaringizdan kelib chiqib javob bersam, to'g'riroq bo'ladi. Agar siz detektiv asarlarga ishqiboz bo'lsangiz,

Alistar Maklin kitoblarini tavsiya etaman. Sadoqat, jasorat, mardlik eng yuksak darajada yoritilgan. Insonning har qanday sharoitda ham inson bo'lib qolishi kerakligini anglashni istasangiz, Jek London asarlariga murojaat qiling. Inson manzaralarini, hayot ranglarini ko'rishni istasangiz, O. Genri novellalarini o'qing. Sevgi haqida o'qishni hamma istaydi. Bu buyuk va noyob tuyg'uning asiri bo'lgan inson kechinmalarini, hissiyotlarini anglamoqchi bo'lsangiz, Stefan Sveyg asarlarini tavsiya etaman. Bu borada tavsiyalarimni yana uzoq davom ettirishim mumkin. Yuqorida nomlari keltirilgan adiblarning ko'pgina asarlari o'zbek adabiy tiliga ham chevirilgan.

– O'zbek adiblari-chi, ulardan kimlarning asarlarini tavsiya etasiz?

– O-oo, ular juda ko'p. Shunday bo'lsa-da, ulardan birini tavsiya etishim kerak va zarur deb hisoblayman. Ehtimol eshitgandirsiz, bu asar haqida anchagina iliq fikrlar bildirildi, yoshlarning katta qismi qizg'in qarshiladi. Yozuvchi Javlon Jovliyevning "Qo'rqma" asari! Asarda Vatan taraqqiyoti uchun yurtsevar oydinlar tavsiyasi bilan Germaniyaga o'qishga ketgan yetmish ikki o'g'il-qiz haqida so'z bor. O'sha yetmish ikki nafar yosh ham sizlardek, Vatanning bir parchasi edilar. Ruhingizga yaqin, qalbingizdagi jo'shqin tuyg'ularingizga hamohang bir asar.

Savollarga jon-dilim bilan javob berdim va... qalbim injidi. Nega deysizmi? Chunki bir necha yildan beri "Vatanparvar" gazetasining "Keling, kitob o'qiyimiz!" sahifasi aynan jahon va o'zbek adiblarini targ'ib qiladi. Demak... bu haqda gapirgim yo'q.

O'QISHGA VAQTINGIZ BORMI?

O'qishga vaqtingiz bormi? Asosiy vaqtingizni qanday kechirasiz? Telefonda hamma narsani topish mumkin... Rostdan ham hamma narsani topish mumkinmi? O'zi nimalarni qidirasiz? Kerak, kerak bo'lmagan xabarlar qanday ajratasiz? Qiziqarli xabarlar ko'p... Nimesi qiziqarli? Qotilliklar, insoniyatning ajralmas balosi – fahshning ochiqligimi? Inson sha'nini yerga uradigan tuhmatlar, haqiqat pardasiga o'ralgan malomatlarmi?

Har kim izlaganini topadi. Hayotda ham, internet kengliklarida ham. Hikmat izlaylik, qalblarga oydinlik olib kiradigan voqealar haqida, eng ko'p o'qiladigan kitoblar haqida so'zlashaylik. Chunki kitoblar dunyomizni o'zgartiradi, ko'nglimizni oydin hislarga oshno etadi.

Men ham siz kabi ijtimoiy tarmoqlarni kuzataman. Ayrim narsalarni gazeta sahifalarida bo'lishgim keladi. Bir oycha avval o'qiganim bir voqeani ko'chirib

olgan edim. Afsuski, muallifining ism-familiyasini yozishni unutibman. Amerika Qo'shma Shtatlarida yashayotgan vatandoshimiz edi. G'oyibona uzr so'ragan holda uning o'g'li bilan sayohati haqidagi parchani sizlarga havola qilaman.

"Mana shu tunnelni ko'rish uchun, o'g'lim ikkalamiz salkam 4 kilometr yo'l yurib bordik. Bu ko'chaga uzunligi 22 fut bo'lgan mashinalar kirishi tavsiya etilmas ekan. Biz minib yurgan g'ildirak ustidagi uyimiz 24 fut edi. Shu sababli ulovni qoldirib, piyoda borishga qaror qildik.

Tunnel 1937-yilda askarlar tomonidan qurilgan. Balandligi 7 fut.

Qaytishda yana piyoda yurmaslik uchun o'tkinchi mashinalardan olib ketishini so'radik. Afsuski, ular bizning o'zbeklarimizga o'xshab "O'tiringlar!" deb, mashinasiga mindirib olib ketavermaydi.

Harqalay bir yigit to'xtadi. "Avtoturargohgacha tashlab qo'ya olasizmi?" deb so'radim. Qaysi avtoturargohligini fahmlaguncha "yo'ning oxirigacha", dedim osonroq tushunishi uchun.

"Xo'p, uzr, lekin mashinamning ichi juda betartib", deb old o'rindiqdagi narsalarni orqa o'rindiqqa ola boshladi.

Mashinaning ichi rostdan ham juda betartib edi. Ammo gap bu haqda emas. Orqa o'rindiqda qalin muqovali o'ntacha kitob bor edi! Ko'p kitob o'qir ekan, deb o'yladim.

Mashinaga o'tirdik. Oyoq ostida yegulik qog'ozlarini ko'rib, yigit mashinada uxlaganligini taxmin qildim. Gappa soldim.

– Ko'p kitob o'qiyasizmi?

– Ha...

– Qancha kitob o'qidingiz?

– Hmm, bu yil hisobidan 47 ta o'qiddim.

– 47 ta?! Vau! Nima ish qilasiz?

– Harbiyman. (O'zim ham shunday bo'lsa kerak deb o'ylagan edim, sochiga qarab) Olti oy dengizda bo'ldik. Shunga kitob o'qish imkonini ko'proq bo'ldi.

– Internet yo'qmidi?

– Bor edi, ammo men kitob o'qishga harakat qildim.

– Hozir ko'pchilik kitob o'qishdan ko'ra ko'proq vaqtini internetda o'tkazadi, – dedim o'zimdand kelib chiqib.

– Ha, shunaqa, – dedi va so'radi, – sizlar qayerliksiz?

– Biz asli O'zbekistondan. Hozir Ohioda turamiz. Siz-chi?

– Men Michigandanman, hozir Kaliforniya janubida yashayman.

– Yoshingiz nechada?

– 23 da.

– Tushunarli...

Manzilga yetib keldik. Mashinani juda sokin, shoshilmasdan boshqarar ekan. Shu qisqa vaqt ichida o'zimga "Ko'proq kitob o'qishim kerak" degan rag'bat oldim. Yigirma uch yashar yigitning olti oyda 47 ta kitob o'qiganini bilganimdan so'ng o'zimni juda ko'p ilmdan qolib ketgandek his qildim".

Men yuqoridagi voqeani o'qiganimdan beri bot-bot o'ylanaman, o'sha michiganlik harbiy yigitga havas qilaman: bizning yigitlarimiz orasida ham shunday o'qirmanlar bormikan? Bor bo'lsa, o'zlaridan xabar bersalar edi...

Inobat IBROHIMOVA,
"Vatanparvar"

Bugun mamlakatimizda ayollarga qaratilayotgan e'tibor, ularning hayotdagi faolligini yanada oshirish va gender tenglikni ta'minlash borasida amalga oshirilayotgan ishlar ko'lami tobora kengayib bormoqda. Ayollarning jamiyat va davlat xizmatlaridagi ishtiroki kundan kunga ortib borayotgan bir paytda, ular Qurolli Kuchlarimiz saffalarida erkaklar bilan yonma-yon, yelkama-yelka turgan holda mardonavor xizmat qilib, katta muvaffaqiyatlarga erishib kelishmoqda.



G'OLIBLAR MUNOSIB TAQDIRLANDI



Davlat xavfsizlik xizmati Chegara qo'shinlarida ham ayol harbiy xizmatchi va ishchi-xizmatchilar, shuningdek harbiy xizmatchilarning oila a'zolarini har tomonlama qo'llab-quvvatlash, harbiy jamoalar hamda oilalardagi axloqiy-ruhiy muhitni yanada mustahkamlash borasida amalga oshirilayotgan tizimli ishlar va erishilayotgan natijalar samarasi o'laroq, bugungi kunda ayol harbiy xizmatchilarning bir guruhi "Sodiq xizmatlari uchun" va "Shuhrat" medallari, "To'maris" hamda "Mo'tabar ayol" ko'krak nishonlari bilan taqdirlangan.

Ko'p yillar davomida yuksak fidoyilik hamda vatanparvarlik namunalari ko'rsatib, o'z iqtidori-yu salohiyati bilan safdoshlariga o'rnak bo'lib kelayotgan mayor Nargiza Babadjanova "Yil ayoli" milliy tanlovida munosib ishtirok etib, respublika miqyosida faxrli 2-o'rinni qo'lga kiritishi sarhadlarimiz posbonlarining cheksiz quvonchiga sabab bo'ldi.

Mayor Nargiza Babadjanova yakuniy natijalarga ko'ra, 147 nafar ayol orasidan faxrli 2-o'ringa munosib deb topildi va tantanalı bayram tadbirida maxsus diplom, statuetka hamda pul mukofoti bilan taqdirlandi.

– Chegara qo'shinlarida xizmat qilayotgan ayol harbiy xizmatchi va ishchi-xizmatchilar, shuningdek harbiy xizmatchilarning oila a'zolarini har tomonlama qo'llab-quvvatlash, harbiy jamoalar va oilalardagi axloqiy-ruhiy muhitni yanada mustahkamlash, harbiy oilalarning ijtimoiy-siyosiy faolligini oshirish, bo'sh vaqtlarini mazmunli o'tkazib, ular o'rtasida sog'lom turmush tarzini targ'ib qilish maqsadida xotin-qizlar kengashlari tashkil etilgan bo'lib, ushbu kengashlarda faoliyat olib borayotgan mas'ullarning malakalarini oshirish maqsadida muntazam ravishda o'quv-uslubiy yig'inlar, mahorat darslari, seminarlar va psixologik treninglar o'tkazib kelinmoqda, – deydi mayor Nargiza Babadjanova.

– Faoliyatimiz davomida ko'proq chekka hududlarda joylashgan chegara bo'linmalariga xizmat safarlarini uyushtirishga harakat qilamiz. Maqsadimiz harbiy oilalardagi fikrlar, kayfiyat va ularning ehtiyojlarini doimiy o'rganib borish, turmush tarzlaridan muntazam xabardor bo'lib, mavjud muammolarini o'z vaqtida hal qilinishiga erishishdan iborat. Tanlovga faoliyatimiz davomida amalga oshirilayotgan ana shunday chora-tadbirlar, erishayotgan natijalarimiz va kelgusida amalga

oshirishi rejalashtirilayotgan ishlarimiz haqida so'zlovchi materiallarni taqdim etdik. Ishtirokimiz hay'at a'zolari tomonidan yuqori baholanib, faxrli o'rinlarga munosib ko'rilganimizdan nihoyatda baxtiyormiz. Albatta, o'tkazilayotgan bunday tanlovlar mamlakatimiz rivojiga munosib hissa qo'shib kelayotgan, yuksak ma'naviyatli, oila va farzand tarbiyasida ibrat ko'rsatayotgan, tizim nufuzini oshirishda faol ishtirok etib kelayotgan xotin-qizlarimizni qo'llab-quvvatlash, ularni jamoatchilikka yaqindan tanishtirish, ilg'or ish tajribalarini ommalashtirish, professional salohiyati, ishbilarmonlik, raqobatbardoshlik sifatleri hamda bilim darajasini yanada oshirish uchun zarur sharoitlarni yaratishda muhim omil bo'lib xizmat qiladi.

Biz yana bir bor hamkasbimizni g'alaba bilan qutlab, kelgusidagi xizmat faoliyatida bundan-da, yuqori natijalarga erishishiga tilakdoshmiz!

Mayor Farida BOBOJONOVA
DXX Chegara qo'shinlari

EHTIROM

Xalqimizning eng oliy fazilatlaridan biri kattalarga hurmat va ehtirom ko'rsatishdir. Ikkinchi jahon urushida halok bo'lgan, fashizm ustidan g'alabaga munosib hissa qo'shgan insonlarni xotirlash, hozirda hayot bo'lgan urush va mehnat faxriylarini qadrlash, ular bosib o'tgan yo'llarni o'rganib, obod kunlarimizga shukronalar aytish barchamizning chinakam insoniylik burchimizdir.



CHINAKAM BAYRAM SOVG'ASI

Yangi yil bayrami munosabati bilan Toifalangan obyektlarni qo'riqlash qo'shinlari qo'mondonligi harbiy xizmatchilari poytaxtimizning Chilonzor va Yunusobod tumanlarida istiqomat qilayotgan bir nechta Ikkinchi jahon urushi faxriylari va nogironlari,

"Leningrad qamali" ishtirokchilarining xonadoniga bordi.

Yo'qlov davomida mehnat faxriylari va urush qatnashchilarining holidan xabar olinib, "O'zbekiston Respublikasi Prezidentining Yangi yil tabrigi" o'qib eshittirildi hamda bir martalik pul mukofoti, qimmatbaho sovg'alar topshirildi.

Nuroniylar mamlakatimizda hukm surayotgan tinchlik va xotirjamlikni qadrlash kerakligini ta'kidlab, faxriylarga qaratilgan g'amxo'rlik uchun o'z tashakkurini bildirdi.

Sherzod EGAMBERDIYEV,
"Vatanparvar"

Shaxs – psixologiya fanining asosiy ilmiy tushunchalaridan biri hisoblanadi. Shaxs tushunchasi “yuz”, “soxta qiyofa” soʻzlaridan kelib chiqadi. Qadimgi rus tilida “soxta qiyofa” soʻzi “rol”, yaʼni odam boshqalar bilan muloqotda boʻlganida kiyib oladigan biror bir ijtimoiy niqob maʼnosini anglatuvchi “rol”ni bildirar edi. Lotincha persone soʻzi ham shu maʼnoni anglatadi. Personare – niqob ortidan soʻzlashish. Qadimgi yunon, keyinchalik esa qadimgi Rim teatrlarida aktyor sahnaga u yoki bu yovuz, laganbardor, qahramon xarakterlari chizilgan niqobda chiqardi. Niqobning boʻyoqlari ijtimoiy vazifani bajaruvchi, u yoki bu rolni ijro etayotgan insonning axloqiy belgilariga ishora edi.

SHAXSDA “MEN”NING



NAMOYON BO'LIHI

Inson oʻta murakkab mavjudot sifatida cheksiz murakkab dunyoda, aniqrogʻi, koʻplab dunyolarda yashaydi, ularning ichidan zamonamizning mashhur faylasuflaridan biri Yurgen Xabermas asosiy sifatida uch dunyoni: tashqi dunyo, ijtimoiy dunyo (“bizning olam”), ichki dunyo (“mening olamim”, *individuallik va betakrorlik* “mening mavjudligimning” *betakrorligi*) tarzida ajratishni taklif etdi.

Tashqi dunyo – bu insonning tabiat qonunlarini bilishda va ularni oʻz maqsadlarida tabiatni qayta tuzish uchun qoʻllashda egallaydigan tabiat olami. Bu fan, texnika, amaliyot olamidir. Bu barcha narsa isbot talab etuvchi maqsadga muvofiq faoliyat olamidir.

Ijtimoiy dunyo – bu insonni dunyoga kiritishning asosiy vositasi **jismlil faoliyat** boʻlgan olam. Insonni atrofdagi olamga va oʻziga nisbatan munosabatlarining rang-barangligida tushunish, faolligining manbalarini topish va yoʻnalishini anglash uchun insonning olamda tutgan oʻrnini aniqlab olish zarur. Insonga shaxs sifatida yondashish, avvalambor, insonga jamiyat tuzilishida tutgan oʻrni bilan aniqlanuvchi jamiyatning birligi sifatida qarash bilan bogʻliqdir. Insonning biologik organizm, tur birligi sifatida hayvondan farq qiluvchi tub negizli belgisi jamiyatga tegishlilik, ijtimoiylik hisoblanadi. Bundan kelib chiqadiki, shaxsni oʻrganishda dastlabki holat boʻlib uning jamiyatdagi oʻrni, ijtimoiy munosabatlar tizimiga kiritilganligi xizmat qiladi.

Umuman olganda, odamning nechtagacha “men”i boʻlishi mumkin? Keling, yuqorida keltirilgan baʼzi “men”larni sanab oʻtamiz.

1. **“Subyektiv (nohaqlik) men”** – bu daʼvogarlik darajasi, yutuqlar motivatsi-

yasi, oʻzini yuzaga chiqarishga intilish, shuningdek oʻz qobiliyatlarini boʻrttirib koʻrsatish. Bunday “men”ning yana bir turi sifatida tugʻma qirra – boshqalar harakatini notoʻgʻri tushuntirish, shaxsiy sifat va layoqatlarini oshirib koʻrsatishdan iborat “sevimli men” namoyon boʻladi.

2. **“Aks ettirilgan men”** ijtimoiylashuv jarayonida paydo boʻladi. Bu tasavvurlar yigʻindisi boshqalarning biz haqimizdagi fikrlaridir. Individ boshqalarga qarab, oʻz harakatlariga muntazam ravishda oʻzgartirishlar kiritib turadi. Boshqalar uning uchun ijtimoiy oyna vazifasini bajaradi.

3. **“Boshqalar kutgan men”** – bu mening fikrimcha, boshqalar menda koʻrmoqchi boʻlganlari, mendan kutayotganlari. Bunda ikkilangan aks ettirishni taʼkidlash lozim: menda haqiqatan ham koʻrmoqchi boʻlgan xususiyatlar emas, mening fikrimcha, koʻrmoqchi boʻlganlardir.

Koʻp hollarda “Kutilgan men” sohasini ota-onalar belgilaydi. Baʼzan ular oʻz farzandlariga bu haqda toʻgʻridan toʻgʻri gapiradilar (*“Haqiqiy musiqachi boʻlib yetishishingni orzu qilaman (olim, shoir va hokazo).*

Odatda, “Kutilgan men” biz uchun obroʻli boʻlgan insonga yoʻnalgan holda tuziladi. Bu ota, ona, qarindoshlar yoki doʻstlardan biri, baʼzida ustoz ham boʻlishi mumkin. Bu insonning obroʻsi qanchalik kuchli boʻlsa, uning kutilganlariga nisbatan yoʻnalish ham shunchalik kuchli boʻladi.

4. **“Koʻrgazmali men”** yoki **“Namoyishkorona men”** katta tantanalarda oʻzining egallab turgan darajasini koʻrsatish, alohida koʻrinish uchun koʻchada kiyiladigan koʻylakni eslatadi. “Na-Men” – bu boshqalarda

yaxshi taassurot qoldirish uchun koʻrsatiladigan xulq-atvor aktlari yigʻindisi. Bunga, shuningdek biz oʻz darajamiz yoki ijtimoiy rolimizdan qatʼi nazar bildiradigan qarashlar, gʻoyalar, xulq-atvor odati va shu kabilarni kiritish mumkin.

5. **“Uydagi men”** koʻchalik koʻylakni yechib, xulq-atvorning koʻrgazmali odatlarini tashlab, boʻshashganda namoyon boʻladi. Masalan, yuvosh ziyoli muhandis uyidagi ayoli va bolalarini qiynaydigan zolimiga aylanadi.

6. **“Samimiy men”** – eng yaqin odamlardan ham sir tutiladigan “Uydagi men”ning yashirin qismi. Har birimizda, hatto yaqin odamlarimizdan yashiradigan sirlarimiz topiladi. U oʻzimiz yakka qolganimizda ochishga imkon berishimiz mumkin boʻlgan, qachondir sodir etilgan va kechirib boʻlmaydigan xatolik hisoblanadigan, anglanmagan va boshqalar tomonidan qoralanadigan istaklar (*ayniqsa, jinsiy*) va boshqalar kabi yomon odatlardan shakllanadi. Boshqacha aytganda, bu biz boshqalarda taʼna qiladigan, lekin oʻzimiz namoyon qiladigan harakatlar va qirralar uchun zaxiradir.

“Men”ning oxirgi uch turi maʼlum koʻrinishda bir-biri bilan yoki oʻzaro bogʻliq boʻladi. “Men”ning boshqa turlariga qaraganda, ularning oʻzaro bogʻliqligi kuchliroqdir. Quyidagi belgilanishlarni kiritamiz:

- “Na-Men” – “Namoyishkorona men”;
- “Uy-Men” – “Uydagi men”;
- “Sa-Men” – “Samimiy men”.

Ular bunday tartibda boshqalarga ishonch bildirish va sir tutilgan haqiqat darajalarining kamayishi boʻyicha joylashtirilgan. Masalan, koʻpchilik bizning “Na-Men”imizni koʻproq, “Sa-Men”imizni esa kamroq biladilar. Lekin eng haqqoniy “men” “Sa-Men”, eng yanglishi esa – “Na-Men”. Oʻrtada yetarlicha haqqoniy va yaqin odamlarga tanish boʻlgan “Uy-Men” joylashadi.

Shunday qilib, xulosa qilish mumkin: “men”imiz bilan qanchalik kam odam tanish boʻlsa, u haqdagi maʼlumot shunchalik haqqoniy boʻladi. “Men”imizni egallagan odamlar soni, “men”imiz haqidagi haqiqat hajmi teskari proporsional bogʻliqlikda joylashadi:

- “Na-Men” – uzoqdagi boshqalar uchun maʼlumot;
- “Uy-Men” – yaqindagi boshqalar uchun maʼlumot;
- “Sa-Men” – faqat oʻzi uchun maʼlumot.

Endi ajratilgan belgilanishlar asosida xulosalarni ifodalashimiz mumkin: “Na-Men” – bu oʻzi haqidagi koʻproq yolgʻon va ozgina haqiqatdir, boshqa soʻzlar bilan aytganda, kamchiliklarning kamrogʻini koʻrsatib, afzalliklarni, baʼzida ular oʻylab topilgan boʻlsa ham yuqori darajada namoyish qilishdir;

“Uy-Men” – oraliq soha – 50 foizi koʻrsatiladigan kamchiliklar va 50 foizi namoyish etiladigan afzalliklar; “Sa-Men” – haqiqatni yuqori darajada va yolgʻonni kamroq darajada bilish, boshqacha aytganda, afzalliklarni kamroq ochib berish va kamchiliklarni koʻproq aniqlash.

Bunga oʻxshash raqamlar chizigʻi asosida pragmatik mulohazalar yotadi. Haqiqatan har birimizda maʼlumki, odam oʻzidan hech narsani yashira olmaydi; yaqinlardan kamchiliklarni yashirish befoyda; uzoqdagilarga kamchiliklarni namoyish qilish xavfli.

Uzoqdagilardan kamchiliklarni, yaxshisi, yashirgan va afzalliklarni ularga koʻrsatgan maʼkul. Individ notanish odamlarga oʻz kamchiliklarini namoyish qilar ekan, uni tarbiya koʻrmagan odam sifatida qabul qilib, u bilan har qanday aloqalarni butunlay uzishlari mumkin.

“Na-Men” – nomaqbul tasavvurning yoki oʻzini odamlarga koʻz-koʻz qilish ehtirosli istagining mevasi emas. Buning orqasida chuqur ijtimoiy maqsadga

muvofiglik turadi: oʻzining eng yaxshi sifatlarini namoyish qilishga intilish didni, oʻziga qarash malakasini, harakatlarni nazorat qilishni, nihoyat, oʻz xulq-atvorini takomillashtirishni shakllantiradi. Oʻzini tutish madaniyati uy sharoitida emas, balki tantanali bayram kechalarida, doʻstlar va mehmonlar davrasida yuzaga keladi.

Shunday qilib, oʻz “men”ining mavjudligi kechinmasi goʻdaklik davrida boshlanadigan va I. Kon “Menni kashf etish” sifatida belgilagan shaxs shakllanishi jarayonining natijasi hisoblanadi. Bir yashar bola tanasidagi hissiyotlari bilan tashqaridagi jismlardan yuzaga keladigan hissiyotlar oʻrtasidagi farqni anglay boshlaydi. Soʻngra, 2–3 yoshida bola unga zavq bagʻishlaydigan jarayon va oʻzining jismlar bilan harakatlari natijasini kattalarning jismlil harakatlariga “Men oʻzim!” talabini qoʻygan holda, ajrata boshlaydi. U birinchi marta oʻzini atrof-muhitdan ayro tutish bilan birga, boshqalarga qarama-qarshi turgan holatda oʻz harakatlarning subyektli sifatida anglay boshlaydi. Bolalar bogʻchasi va maktab chegarasida, kichik sinflarda kattalar, ota-onalar va oʻqituvchilar yordamida shaxsiy psixik sifatlarini baholashga vaqtincha yutuq va kamchiliklarining sababini anglash darajasida yondashish imkoniyati tugʻiladi. Nihoyat, oʻsmirlik va oʻspirinlik davrida ijtimoiy hayot va mehnat faoliyatiga faol kirishish natijasida ijtimoiy-axloqiy oʻzini baholashning kengaytirilgan tizimi shakllana boshlaydi, oʻzini anglash taraqqiyoti nihoyasiga yetib, asosan, “men” obrazi tarkib topadi.

Oʻzini baholash – bu shaxs tomonidan oʻz-oʻzini, oʻz imkoniyatlari, sifatlarini va odamlar orasidagi oʻrnini baholashi. Bu psixologiyada oʻzini anglashning eng koʻp oʻrganilgan tomoni.

Shaxs asosiga tegishli boʻlgan holda oʻzini baholash xulq-atvorining muhim boshqaruvchisi boʻlib xizmat qiladi. Odamning atrofdagilar bilan oʻzaro munosabatlari, uning oʻziga nisbatan tanqidiyligi, talabchanligi, yutuq va kamchiliklarga munosabati oʻzini baholashga bogʻliqdir. Oʻzini baholash qanday tarkib topadi? Boshqa odamning sifatlarini oʻrgangan sayin shaxs xususiy bahoni ishlab chiqish imkonini yaratuvchi zarur maʼlumotlarga ega boʻladi. Shaxsiy “men” haqida tarkib topgan baholanish shaxsning boshqa odamlarda koʻradiganlari va oʻzidagi kuzatishlar bilan muntazam ravishda solishtirib borishning natijasidir. Odam oʻzidagi baʼzi bir narsalarni bilgan holda oʻzini u bilan solishtiradi, boshqaning ham uning shaxsiy sifatleri, harakatlari, ifodalariga befarq emasligini taxmin qiladi; bularning barchasi shaxsni oʻzini baholashga tegishli boʻlib, uning ruhiy kayfiyatini belgilaydi. Boshqacha aytganda, shaxs doim referent guruh (*real yoki ideal*)ga egadir, shaxs unda oʻz qadriyatlarini oʻzlashtirgani uchun bu guruh bilan hisoblashadi.

Hammadan koʻra, koʻproq oʻzimizni kuzatganimiz uchun oʻzi toʻgʻrisidagi haqiqatni biladi. Koʻp hollarda “men”imizning ijobiy va salbiy tomonlarini bilgan yaqinlarimiz turli vaziyatlarda bizlarni kuzatadilar. Yaqinlarimizni qanchalik koʻproq kamchilik va nuqsanlarimizga ishonitiradigan boʻlsak, ularda shunchalik darajada insoniy hamdardlikni uygʻotamiz, oʻzaro munosabatlarimiz shunchalik samimiy boʻladi, nihoyat, ular shu darajada yordam qoʻlini choʻzishga tayyor turadilar. Toʻgʻri, albatta, yaqinlarga oʻz kamchiliklarini namoyish qilishning ham maʼlum meʼyori boʻlishi darkor.

N. MIRASHIROVA,
Qurolli Kuchlar akademiyasi
Harbiy psixologiya va pedagogika
kafedrasini dotsenti.
M. ABIDJANOVA,
katta oʻqituvchi



Poytaxtimizdagi “Yunusobod” sport majmuasida 14-yanvar – Vatan himoyachilari kuni hamda o‘z vazifasini bajarish chog‘ida qahramonlik va jasorat ko‘rsatib, halok bo‘lgan harbiy xizmatchilar va xodimlar xotirasiga bag‘ishlangan qo‘l jangi bo‘yicha “Xotira turniri” bo‘lib o‘tdi.

YANGI CHEMPIONLAR

“Xotira turniri” O‘zbekiston Respublikasi Mudofaa vazirligi, Yoshlar siyosati va sport vazirligi hamda huquqni muhofaza qilish organlari hamkorligida Qo‘l jangi federatsiyasi tashabbusi bilan tashkil qilindi. Unda Qurolli Kuchlar tarkibiga kiruvchi vazirlik va idoralarning 52 nafar harbiy xizmatchisi jami 8 ta – 57, 62, 67, 73, 80, 88, 97, +97 kg vazn toifasida tatamida jang olib bordi.

Musobaqaning tantanali ochilish marosimida Prezident davlat xavfsizlik xizmati, Mudofaa, Ichki ishlar va Favqulodda vaziyatlar vazirliklari, Milliy gvardiya, Davlat xavfsizlik xizmati va Davlat bojxona qo‘mitasi rahbariyati, Xalqaro qo‘l jangi federatsiyasi prezidenti Sergey Astaxov, hamkor davlat va jamoat tashkilotlari vakillari, faol va havaskor yoshlar hamda sport ustalari ishtirok etdi. Barcha vazirlik va idoralar rahbarlari turnirning final janglarini bevosita kuzatib bordi. Shuni alohida ta’kidlash joizki, har yili o‘tkazilishi an’anaga aylangan mazkur musobaqa bu yil Mudofaa vazirligi tomonidan yuqori saviyada tashkillashtirildi.

Musobaqani O‘zbekiston Respublikasi mudofaa vaziri general-leytenant Bahodir Qurbonov kirish so‘zi bilan ochib berdi va o‘z nutqida yurtimizda qo‘l jangi sport turini rivojlantirish, uning moddiy-texnik bazasini yaxshilash, ushbu sport turini yoshlar orasida ommalashtirish borasidagi islohotlar Prezidentimizning “Qo‘l jangi sport turini yanada rivojlantirish chora-tadbirlari to‘g‘risida”gi qarori bilan yanada mustahkamlanganini alohida ta’kidladi.

So‘nggi yillarda qo‘l jangi bo‘yicha sportchilarimizning jahon arenalarida g‘oliblikni qo‘lga kiritib, yuqori natijalarga erishayotgani dunyo hamjamiyati nigohiga tushib ulgurdi. Bu esa nafaqat yurtimizda, balki butun dunyo yoshlari orasida qo‘l jangi sport turiga qiziqish ortayotganidan dalolat berishini aytdi. Shu sabab ushbu sport turini Osiyo davlatlari miqyosida ham keng rivojlantirish maqsadida yurtimizda Osiyo qo‘l jangi federatsiyasi tashkil etilgani, o‘z o‘rnida qo‘l jangi sport turi bo‘yicha 2025-yilda Toshkent shahrida o‘tkazilishi rejalashtirilgan, o‘smirlar o‘rtasidagi Osiyo hamda kelgusida Olimpiya o‘yinlariga kiritishga katta qadam qo‘yilganiga alohida urg‘u berildi.

Xalqaro qo‘l jangi federatsiyasi prezidenti Sergey Astaxov ham so‘zga chiqib, O‘zbekistonda qo‘l jangi sport turining tez sur‘atlarda rivojlanib borayotgani, sportchilarimizning jahon arenalarida ham yuqori natijalarga erishayotganini ta’kidladi.





KASHF ETILDI



Bahrom ABDURAHIMOV



Ochilish marosimining konsert dasturidan so'ng bellashuvlarga start berilib, g'oliblar birin-ketin aniqlana boshlandi. Darhaqiqat, kunning birinchi yarmida o'tkazilgan saralash bosqichi jangchilar uchun oson kechmadi. Chunki har bir harbiy xizmatchi g'oliblik uchun bor imkoniyatini ishga soldi. Final maydoniga esa saralash bellashuvlarida muvaffaqiyatli ishtirok etib, yuqori natijalarni qayd etgan eng kuchlilargina ko'tarildi. Hal qiluvchi janglar intrigaga boy o'tdi.

Shiddatli va murosasiz kechgan bahslar yakuni bo'yicha umumjamoa hisobida Davlat xavfsizlik xizmati jamoasi birinchi o'rinni qo'lga kiritdi. Ikkinchi o'rin Mudofaa vazirligi harbiy sportchilariga nasib qilgan bo'lsa, uchinchi o'ringa Ichki ishlar vazirligi vakillari munosib ko'rildi. Shuningdek, bir nechta vazn toifasida va nominatsiyalar bo'yicha ham qo'l jangi ustalari aniqlandi. Aytish mumkinki, mazkur musobaqa yangi chempionlar nomini kashf etgani bilan ham ahamiyatli bo'ldi.

G'olib va sovrindorlar turnir tashkilotchilari tomonidan kubok, diplom va esdalik sovg'alar bilan munosib taqdirlandi.

Katta leytenant
Islomjon QO'CHQOROV,
"Vatanparvar"

ZAMONAVIY ta'lim imkoniyatlari

Jamiyatning har tomonlama ravnaq topishi, taraqqiy etishi ta'limning rivojlanishiga va mazmunan takomillashib borishiga bog'liq. Ta'limning globallashuvi, innovatsion texnologiyalarning joriy etilayotgani, ayni paytda keng ko'lamlı axborotlar oqimi ta'lim mazmunini muntazam yangilab, takomillashtirib borishni taqozo etadi.

Bugungi tez o'zgaruvchan iqtisodiy, ijtimoiy va ma'naviy hayot oliy harbiy ta'lim muassasasi kursantining dunyoqarashini shakllantirish, yangi pedagogik interfaol metodlardan keng foydalanishni taqozo qiladi. An'anaviy mashg'ulotlar olib borish asta-sekin o'z o'rini intensiv va interfaol metodlarga, noan'anaviy dars o'tish usullariga bo'shatib bermoqda.

Bilim qanchalik mustahkam bo'lsa, kursant dunyoqarashi, intellektual salohiyati shunchalik rivojlanadi va kamol topadi. Oliy harbiy ta'lim muassasalarida ta'lim-tarbiya jarayonining samaradorligini oshirish, ilm-fanning so'nggi yutuqlarini

amaliyotga joriy etish orqali ijodkor, ijtimoiy faol, yuksak ma'naviyatli, ona Vatanga sadoqatli, milliy va umuminsoniy qadriyatlarni ardoqlaydigan, ijodiy va mustaqil fikr yurita oladigan, davlat, jamiyat va oila oldida o'z burchi va javobgarligini his etadigan barkamol shaxsni kamolga yetkazish kabi muhim vazifalarni muvaffaqiyatli hal etish ta'lim-tarbiya jarayonida zamonaviy ta'lim usullaridan foydalanishni taqozo etadi.

Zamonaviy ta'lim kursantni butun bir ta'lim tizimining markaziga qo'yadi va unga tabiatan berilgan

o'z qobiliyatini ro'yobga chiqarishi uchun har tomonlama qulay, xavfsiz, erkin shart-sharoit yaratadi. Kursant bunday ta'lim tizimidagi asosiy bo'lmagan maqsadlarga erishish vositasi emas, balki uning asosiy maqsadi hisoblanadi. Zamonaviy ta'lim kursantning fikrlash va harakat strategiyasini inobatga olgan holda uning shaxsi, o'ziga xos xususiyatlari, qobiliyatini rivojlantirishga yo'naltirilgan ta'limdir. Bu turdagi ta'lim kursantlarda mustaqillik, tashabbuskorlik, javobgarlik kabi sifatlar, shuningdek mustaqil, ijodiy va tanqidiy fikrlash qobiliyatlarini tarbiyalashga xizmat qiladi. Bu turdagi ta'limni tashkil etish professor-

o'qituvchilardan har bir kursantga imkon qadar individual yondashishni, uning shaxsini hurmat qilishni, unga ishonch bildirishni taqozo etadi.

Kursantlar mustaqil fikrlay olsalar, har bir masalaga ijodiy yondashsalar, to'g'ri xulosa chiqara olsalar ana shu o'qitish jarayonining asosi hisoblanadi. Zamonaviy ta'lim texnologiyalari kursantdagi mustaqillik, tashabbuskorlik, javobgarlikni his etish, tanqidiy fikrlash kabi sifatlarini tarbiyalaydi.

Sh. PAZILOVA,
Qurolli Kuchlar akademiyasi
Tabiiy fanlar kafedrası dotsenti

YIG'ILISH

Markaziy kengashning yangilangan tarkibi tasdiqlandi

O'zbekiston Respublikasi mudofaasiga ko'maklashuvchi "Vatanparvar" tashkilotining navbatdan tashqari konferensiyasida markaziy kengashning yangilangan tarkibi tasdiqlandi.



Konferensiyadan so'ng yangi tarkib ishtirokida o'tkazilgan "Vatanparvar" tashkiloti markaziy kengashi yig'ilishida tashkiliy va asosiy masalalar ko'rib chiqildi. Jumladan, tashkilot markaziy kengashi raisining harbiy-vatanparvarlik tarbiyasi va tashkiliy-ustav faoliyati bo'yicha birinchi o'rinbosari lavozimiga Nurmuhammad Mulabayev, raisning ommaviy texnik kasb mutaxassislarini tayyorlash bo'yicha o'rinbosari lavozimiga Nizomjon Parmanov hamda raisning sport ishlari bo'yicha o'rinbosari lavozimiga Anvar Kurbaniyazov munosib deb topilib, bir ovozdan saylandilar. Shuningdek, markaziy kengash hay'ati tarkibi tasdiqlandi.

Tadbir davomida "O'zbekiston Respublikasi mudofaasiga ko'maklashuvchi "Vatanparvar" tashkiloti faoliyatini takomillashtirish bo'yicha 2023-2024-yillarga mo'ljallangan maqsadli dastur" yig'ilish ishtirokchilari tomonidan bir ovozdan ma'qullandi.

HARBIY-VATANPARVARLIK

O'zbekiston Respublikasi Qurolli Kuchlari tashkil etilganining 32 yilligi hamda Vatan himoyachilari kuni munosabati bilan mamlakatimiz bo'ylab mudofaaga ko'maklashuvchi "Vatanparvar" tashkiloti tomonidan qator harbiy-vatanparvarlik tadbirlari va sport musobaqalari tashkil etilmoqda.

Yoshlarning muzeyga sayohati

Tashkilotning Toshkent shahri kengashi tasarrufidagi Mirzo Ulug'bek tumani o'quv sport-texnika klubi tomonidan poytaxtimizdagi umumta'lim maktablari o'quvchilarining Qurolli Kuchlar davlat muzeyiga ekskursiyasi tashkil etildi. Ekskursiya davomida o'quvchilarga ekspozitsiyalar orqali mamlakatimiz Qurolli Kuchlari tarixi, Markaziy Osiyo xalqlari harbiy san'ati hamda zamonaviy O'zbekiston mudofaa qobiliyati rivojlanishining bosqichlari to'g'risida ma'lumotlar berildi.

Tadbir davomida yoshlar muzey xodimlaridan o'zlarini qiziqtirgan savollariga javob oldilar. Ularda ajdodlarimizning harbiy-jangovar salohiyatidan faxr va g'urur hissi uyg'ongani ekskursiya mobaynida yaqqol sezilib turdi. Ushbu tadbirni tashkil etishdan asosiy maqsad ham yoshlarni harbiy-vatanparvarlik, ona yurtga muhabbat va sadoqat ruhida tarbiyalashdan iboratdir.



ENG NAMUNALI YETAKCHILAR ANIQLANDI

Nukus garnizoni Ma'naviyat va ma'rifat markazida Qoraqalpog'iston Respublikasidagi kuch tuzilmalarining yosh harbiy xizmatchilari o'rtasida "Yosh harbiylar forumi" hamda O'zbekiston yoshlar ittifoqining harbiy qism va muassasalardagi boshlang'ich tashkiloti yetakchilari o'rtasida o'tkazilgan "Eng namunali boshlang'ich tashkilot yetakchisi" ko'rik-tanlovining taqdirlash marosimi bo'lib o'tdi.

O'zbekiston yoshlar ittifoqi Qoraqalpog'iston Respublikasi kengashi tomonidan joriy yil davomida 70 dan ortiq tadbir va loyihalar tashkil etildi. Hududdagi kuch tuzilmalarida O'zbekiston yoshlar ittifoqining 16 nafar boshlang'ich tashkilot yetakchisi faoliyati samarali yo'lga qo'yilgan bo'lib, tashkil etilayotgan turli-tuman tadbirlar, uchrashuv va davra suhbatlari orqali nafaqat armiyadagi yoshlarning, balki mahalla va ovulda o'sib kelayotgan yosh avlod vakillarining ham vatanparvarlik ruhidagi tarbiyasini yuksaltirishga erishilyapti.

Forum doirasida yoshlar ma'naviyatini yuksaltirish, ularda milliy g'urur, iftixor va or-nomus fazilatlarini shakllantirish, yoshlar bilan ishlashni to'g'ri yo'lga qo'yish, bo'sh vaqtini mazmunli tashkil etish bo'yicha mutaxassislar tomonidan kerakli tavsiya va takliflar berildi. Qoraqalpog'iston Respublikasida joylashgan kuch

tuzilmalarining boshlang'ich tashkilotlarida yoshlarga oid amalga oshirilayotgan ishlar hamda harbiy qism va muassasalardagi faoliyati tahlil qilinib, tegishli xulosalar ishlab chiqildi.

Qoraqalpog'iston Respublikasida joylashgan kuch tuzilmalaridagi Yoshlar ittifoqi boshlang'ich tashkilotlari o'rtasida tashkil etilgan "Eng namunali boshlang'ich tashkilot yetakchisi" ko'rik-tanlovining g'olibligi Ichki ishlar vazirligiga qarashli Xalqaro aeroportlarda xavfsizlikni ta'minlash bo'limining boshlang'ich tashkilot yetakchisi kapitan Abbas Beknazarovga nasib etdi. Ikkinchi o'rin Mudofaa vazirligiga qarashli Nukus garnizonidagi harbiy qism boshlang'ich tashkilot yetakchisi katta leytenant Mehridin Tinglashevga, 3-o'rin esa Milliy gvardiyaning Qoraqalpog'iston Respublikasi

Qo'riqlash boshqarmasi boshlang'ich tashkilot yetakchisi katta leytenant Miyras Kudaybergenovga nasib etdi.

G'olib va sovrindorlar diplom hamda esdalik sovg'alar bilan taqdirlandi. Shuningdek, tadbirda yil davomida o'ziga yuklatilgan vazifalarga vijdonan yondashib, sidqidildan xizmat qilgan harbiy xizmatchi va xodimlarning mehnati hududiy kengash tomonidan e'tirof etildi.

Tadbinning ijodiy qismida Nukus garnizonidagi askarlarning saf elementlari va qo'l jangi bilan ko'rgazmali chiqishlari barchani hayratda qoldirgan bo'lsa, garnizon Ma'naviyat va ma'rifat markazi harbiy orkestri va san'atkorlari tomonidan ijro etilgan qo'shiqlar yig'ilganlarga bayramona kayfiyat ulashdi.

**Podpolkovnik
Timur NARZIYEV,
Shimoli-g'arbiy harbiy okrug
matbuot xizmati boshlig'i**



✓ AQL BAHSI

O'zbekiston Respublikasi Qurolli Kuchlari tashkil etilganining 32 yilligi hamda Vatan himoyachilari kuni munosabati bilan Qurolli Kuchlar Harbiy tibbiyot akademiyasida harbiy xizmatchilar, kursantlar, faxriylar va o'quvchi-yoshlar ishtirokida shaxmat musobaqasi bo'lib o'tdi.

UCH AVLOD SHAXMAT MAYDONIDA



– Shaxmat eng qadimiy sport turi bo'lib, insonning fikrlash qobiliyati, aqliy salohiyatini yuksaltirish, maqsadli qaror qabul qilish ko'nikmalarini shakllantirishda muhim rol o'ynaydi, – deydi kursant S. Saidov. – O'rta asrlarning buyuk qomusiy olimi Abu Rayhon Beruniy o'zining "Hindiston" asarida shaxmatning kelib chiqish tarixi va inson ma'naviy kamolotidagi ahamiyatini to'la ochib

bergan. Bugungi musobaqa ishtirokchilari buyuk bobomiz nomi bilan bog'langan ushbu bellashuvda bor mahoratlarini namoyish etdilar.

Yoshlarda ona yurt taqdiri uchun mas'uliyat tuyg'usini mustahkamlash, ularning sharaffi kasbga intilishlarini qo'llab-quvvatlash, armiya saflaridagi yoshlar bilan harbiy-vatanparvarlik yo'nalishidagi tadbirlarni tizimli ravishda

yangicha tashkil etish maqsadida o'tkazilgan musobaqa o'quvchi-yoshlar uchun unutilmas lahzalarga boy bo'ldi.

Qiziqarli va murosasiz kechgan o'yinda g'oliblar akademiya boshlig'i tomonidan diplom va qimmatbaho sovg'alar bilan taqdirlandi.

**Podpolkovnik
Doniyor JAMOLOV**

Mudofaa vazirligiga qarashli Andijon viloyati Xonobod shahridagi harbiy qism madaniyat markazida "Zahiriddin Muhammad Bobur izidan" ko'rik-tanlovining qo'shilma bosqichi bo'lib o'tdi.

ZAHIRIDDIN IZIDAN

Buyuk sarkarda Zahiriddin Muhammad Boburning qudratli davlatni tashkil etishdagi strategik yondashuvi, amalga oshirgan islohotlari, qo'shinni boshqarish mahoratini o'rganish, chuqur tahlil qilish maqsadida o'tkazilgan bellashuvda Farg'ona, Namangan va Andijon viloyatlarida joylashgan Mudofaa vazirligiga qarashli harbiy qismlardan saralanib kelgan jamoalar o'zaro bellashdi.

Tanlovda jamoalar "Zahiriddin Muhammad Bobur – o'zbek mumtoz adabiyotining buyuk namoyandasi", "Zahiriddin Muhammad Bobur – mohir va iste'dodli sarkarda", "Zahiriddin Muhammad Bobur – boburiylar imperiyasi asoschisi" shartlari bo'yicha hakamlar hay'ati tomonidan adolatli hamda xolisona baholab borildi.

Yakuniy natijalarga ko'ra, "Bobur izdoshlari" (Farg'ona viloyati) jamoasi 1-o'rinni egalladi va keyingi bosqichga yo'llanmani qo'lga kiritdi. "Mubayyin" (Andijon viloyati) va "Humoyun" (Namangan viloyati) jamoalariga 2- va 3-o'rinlar nasib etdi. G'olib va sovrindorlarga diplom hamda esdalik sovg'alar topshirildi.



TINGLOVCHILAR G'ALABA BOG'IDA

Qurolli Kuchlar akademiyasi negizidagi mutaxassislarni tayyorlash kursi tinglovchilari ishtirokida Toshkent shahrida joylashgan diqqatga sazovor joylar va "G'alaba bog'i" yodgorlik majmuasiga ekskursiya tashkil etildi.



Ikkinchi jahon urushida erishilgan g'alabada O'zbekiston aholisining o'rni beqiyos. Barcha iqtisodiy obyektlar, zavod va fabrikalar urushning frontorti ta'minotida katta ahamiyat kasb etgan. Ekskursiya davomida harbiy xizmatchilar shu kabi qiziqarli ma'lumotlar bilan tanishdilar. Bog' ekspozitsiyalari, o'sha davrning frontorti ta'minotidagi hayot, shuningdek bog'da joylashgan "Shon-sharaf" davlat muzeyidagi nodir qo'lyozmalarning guvohi bo'ldi.

Shuningdek, poytaxtimizda joylashgan tarixiy va diqqatga sazovor joylarga ekskursiya uyushtirildi. Unda yurt posbonlari milliy urf-odatlarimiz, etnologik madaniyatimizni o'zida mujassam etgan, qo'l mehnati yordamida tayyorlangan nodir hunarmandchilik va kashtachilik mahsulotlarining ko'rgazmasida ham ishtirok etdi. Bu kabi tadbirlar milliy qadriyatlarimiz hamda boy tariximizni mukammal o'rganishda muhim ahamiyat kasb etadi.

SPORT

"KOMANDIR KUBOGI" TURNIRI

Mudofaa vazirligi qo'shinlarida yosh avlod o'rtasida sog'lom turmush tarzini targ'ib qilish, sportni yanada ommalashtirish maqsadida tizimli ishlar amalga oshirilmoqda.

Mudofaa vazirligiga qarashli Farg'ona viloyatida joylashgan harbiy qismda tashkil etilgan "Muay-tay" to'garagi a'zolari, harbiy xizmatchilarning farzandlari va mahalliy yoshlar o'rtasida "Harbiy qism komandiri kubogi" turniri bo'lib o'tdi. Ta'kidlash joizki, uzoq yillardan buyon harbiy qismda faoliyat yuritib kelayotgan ushbu sport to'garagi a'zolari Osiyo va Yevropada o'tkazilgan jahon chempionatlarida munosib ishtirok etib, g'oliblikni qo'lga kiritib kelmoqda.

Viloyatning ko'plab hududlarida faoliyat yuritayotgan sport klublari a'zolari qatnashgan musobaqada turli vazn toifasida sportchilar g'oliblik uchun kurash olib bordi. Yakunda g'oliblikni qo'lga kiritgan sportchilarga harbiy qism komandiri tomonidan kubok, diplom va qimmatbaho sovg'alar topshirildi.



SAXOVAT

BOLAJONLAR QALBIDA BAYRAM SHUKUHI

Vatanparvarlik oyligi doirasida mamlakatimiz bo'ylab ko'plab uchrashuvlar, festivallar va mehr-muruvvat aksiyalari o'tkazilmoqda. Ana shunday tadbirlardan biri Angren shahridagi 34-son tayanch harakat a'zolari shikastlangan bolalar uchun ixtisoslashtirilgan maktab-internat uyida o'tkazildi.



Toshkent viloyati Olmaliq shahrida joylashgan Mudofaa vazirligiga qarashli harbiy qism tashabbusi bilan internat tarbiyalanuvchilarining murg'ak qalbini xushnud etish hamda bayram shukuhini ulashish maqsadida o'tkazilgan tadbir harbiy orkestr tomonidan ijro etilgan musiqa sadolari ostida boshlandi.

Bag'rikeng xalqimiz azal-azaldan yordamga muhtoj, imkoniyati cheklangan insonlarga e'tibor va g'amxo'rlik ko'rsatishni eng muhim qadriyatlaridan biri sifatida e'zozlab keladi. Harbiy xizmatchilarning ertak va multfilm qahramonlarini gavdalandirgan sahna ko'rinishlari barchaga birdek manzur bo'ldi. Bolajonlar tomonidan ijro etilgan kuy-qo'shiqlar va raqslar tadbirga yanada ko'tarinkilik bag'ishladi.

Tadbir so'ngida internat uyidagi tarbiyalanuvchilarga qo'mondonlikning bayram sovg'alari ulashildi.

ERTAMIZ EGALARI

VATANPARVARLIK TARG'IBOTI

O'zbekiston Respublikasi Qurolli Kuchlari tashkil topganining 32 yilligi hamda 14-yanvar – Vatan himoyachilari kuni munosabati bilan yurtimiz bo'ylab Vatanparvarlik oyligi yuqori saviyada o'tkazib kelinmoqda.



Jumladan, Mudofaa vazirligiga qarashli Qashqadaryo viloyati G'uzor tumani, Toshkent viloyati Olmaliq shahri hamda Navoiy viloyatining Uchquduq va Zarafshon shaharlarida joylashgan harbiy qismlarga birlashtirilgan maktablarning o'quvchilari bilan "Yangi O'zbekiston armiyasi mamlakat qudrati, yuksak g'urur va sadoqat timsolidir!" shiori ostida davra suhbat, sport musobaqalari va vatanparvarlik darsi o'tkazildi.

Harbiy xizmatchilar tomonidan namoyish etilgan ko'rgazmali qo'l jangi va faxriy qorovul chiqishlari tadbirlarga yanada ko'tarinkilik bag'ishladi. Harbiy xizmatchilar, harbiy sportchilar faol ishtirok etgan va qizg'in tarzda o'tgan tadbirlar yoshlarda unutilmas taassurot qoldirdi. Bunday uchrashuvlar, musobaqalar va madaniy tadbirlar ertamiz egalarini harbiy-vatanparvarlik ruhida tarbiyalashda muhim omil bo'lib xizmat qiladi.

Chirchiq oliy tank qo'mondonlik-muhandislik bilim yurtida Mudofaa vazirligi oliy harbiy bilim yurtlari hamda harbiy qism va muassasalar o'rtasida "Quvnoqlar va zukkolar" ko'rik-tanloving yakuniy bosqichi bo'lib o'tdi.



"Quvnoqlar va zukkolar" da g'oliblar aniqlandi



Muallif suratga olgan

Unda Mudofaa vazirligi tasarrufidagi 5 ta oliy harbiy ta'lim muassasasi jamoalari o'zaro bellashgan bo'lsa, harbiy okrug va qo'mondonliklardan 7 ta jamoa birinchi uchun kuch sinashdi. Uch shartdan iborat bo'lgan tanlov bir-biridan qiziqarli sahna ko'rinishlariga boy bo'ldi. Birinchi shartda jamoalar o'zlarini tanishtirishlari va ikkinchi shartda qisqa savollarga yumor orqali javob berishi belgilangan edi. So'nggi shart esa uyga vazifa sifatida berilgan bo'lib, unda ishtirokchilar o'zlarini faoliyat yuritayotgan muassasada mavjud muammoli vaziyatlarni kulgi ostiga olib, mashhur qo'shiqlarga parodiya shaklida namoyish etishlari kerak bo'ldi.

Aslida tanlovdan ko'zlangan asosiy maqsad harbiy xizmatchilarni ma'naviy-axloqiy va intellektual jihatdan rivojlantirish, bo'sh vaqtini mazmunli o'tkazish va madaniy hordiq chiqarishini ta'minlashdan iborat bo'lsa-da, tanlov o'z nomi bilan tanlov. Unda kimdir g'olib, kimdir esa mag'lub bo'lishi tabiiy.

Ikki kun davom etgan ushbu musobaqaning yakuniga ko'ra, oliy harbiy ta'lim muassasalari o'rtasida 3-o'rinni Qurolli Kuchlar akademiyasining "O'zbekim" jamoasi qo'lga kiritdi. Faxrli 2-o'rinni O'zbekiston oliy harbiy aviatsiya bilim yurtining "Aviators" jamoasi zabt etdi. Hakamlar hay'atining qaroriga ko'ra, mutlaq g'oliblik Chirchiq oliy tank qo'mondonlik-muhandislik bilim yurtining "Quvnoq tankchilar" jamoasiga nasib etdi.

– Tanlovda ishtirok etgan har bir jamoaning mehnatini yuksak qadrlayman. Aslida kulgi orqali namoyish etilayotgan ko'pgina hazillarning tag zamirida anchagina haqiqatlar ham borligini ko'rishimiz mumkin. Kursantlar va harbiy xizmatchilarning kulgiga solib aytayotgan bunday muammo va masalalarning yechimiga barchamiz birdek e'tibor qaratishimiz kerak, – deydi mayor Boburmirzo Soliyev. – Askiya va latifa juda nozik janr hisoblanadi. Me'yordan oshib ketishi bachkanalikka olib kelsa, kamayib ketishi tomoshabinni kuldira olmaydi. Bugun biz ko'rgan aksariyat yumorga boy sahna ko'rinishlari me'yorida bo'lgan deya olaman. "Aviators" jamoasining chiqishlari raqib jamoa muxlislari tomonidan ham juda iliq kutib

olindi. 0,1 ball farq birinchi o'rin uchun bor kuch-g'ayratini ishga solgan kursantlarimizning 2-o'rinda qolishiga sabab bo'ldi. Oldingi yillarga nisbatan bu yilgi natijamiz ancha yaxshi bo'ldi. Ammo keyingi safar 1-o'rinni olib, kubokni Qarshi shahriga olib ketish uchun bor imkoniyatimizni ishga solamiz.

Mudofaa vazirligi harbiy qism va muassasalari o'rtasida bo'lib o'tgan yakuniy bahs ham juda shiddatli va qiziqarli o'tdi. Umumiy 7 ta jamoaning natijalariga ko'ra, 3-o'rinni Janubi-g'arbiy maxsus harbiy okrugning "Janub yulduzlari" jamoasi egalladi. 2-o'rinni Shimoli-g'arbiy harbiy okrugning "Brigada" jamoasi zabt etdi. Finalning eng so'ngida esa 2 ta 1-o'rinni qo'lga kiritgan jamoalar sahnaga chiqishiga to'g'ri keldi. Markaziy harbiy okrugning "Artilleriya" va Toifalangan obyektlarni qo'riqlash qo'shinlari qo'mondonligining "Fidoylar" jamoalari mutlaq g'olib deya e'tirof etildi.


Shuningdek, Qurolli Kuchlar harbiy tibbiyot akademiyasi kursanti Musulmonbek To'ramurodov hamda Toshkent harbiy okrugining kontrakt bo'yicha harbiy xizmatchisi, oddiy askar Abror Hoshimov "Eng yaxshi aktyor" nominatsiyasiga loyiq topildi.

G'olib va sovrindorlar kubok, diplom va qimmatbaho sovg'alar bilan taqdirlandi.

Sherzod SHARIPOV,
"Vatanparvar"



Insoniyat tamaddunida uning ehtiyojiga hamohang tarzda kiyim-boshlar ham taraqqiy etib bordi. Uning tadrijiy rivojlanishi harbiy kiyimlarda yaqqol namoyon bo'ladi. Harbiy kiyimlar tarixi chuqur o'rganilmagan soha bo'lib, u o'zida ko'plab sirlarni pinhon saqlagan.



HARBIY KIIYIMLAR TARIXI O'RGANILGANMI?



mahalla va guzarlari mavjud bo'lib, ularga yondosh mato va kalavalarga bo'yoq beruvchi nilchi rangrezlar, chitlarga gul bosuvchi muhrkash va chitgarlar istiqomat qilgan.

Oddiy matolar bilan bir qatorda qo'shinlar uchun zarur bo'lgan kigiz ishlab chiqaruvchi, zirh va simto'rlar to'quvchi korxonalar ham faoliyat yuritib, ular tomonidan tayyorlangan mahsulotlar mamlakat qo'shinlari ehtiyojini qondirgan. Yirik davlatlarga asos solgan ajdodlarimizning ming-minglab askarlarini harbiy ust-boshlar, zirhli harbiy kiyimlar bilan ta'minlanishi mamlakatda katta bir sanoat – ishlab chiqarish mavjudligini bildiradi. Charm mahsulotlaridan tayyorlangan harbiy kiyimlar, ayniqsa o'ziga xos tarixga ega. Uzoq tarixda Atilla qo'shinining kiyimi boshdan oyoq charmdan tayyorlangani haqida yevropalik tarixchilar batafsil yozishgan.

Kamon o'qlari, qilich tig'larini qaytaradigan, qor-yomg'ir va ayozdan saqlaydigan pishiq va sifatli charmlardan turli andazadagi harbiy kiyimlar Amir Temur va Temuriylar davrida ham ko'plab tayyorlangan.

BAGTAR, JAVSHAN, KEJIM...

Biz turli manbalardan foydalanib, ularning ayrimlarini quyidagicha jamladik:

bagtar – temir nimcha. Temirdan yasalgan va har ikki tomoni baxmal bilan qoplangan tanani himoya qiluvchi libos.

Boshdan oyoq sovut-u bagtarga g'arq bo'lib, mardi maydonlik bilagini, shijoat va farzonalik boshini baland ko'tardilar ("Abdullanoma");

govsar – boshga kiyiladigan sigirboshsimon himoya kiyim.

Qalqondan, sovutdan, govvardan o'tkazib, dushmani yiqita-yiqita otdilar ("Boburnoma");

dagala – askarlarning ust kiyimi; **dubulg'a** – metallardan tayyorlangan ushbu bosh kiyimning ichiga kigiz qoplangan. Qo'shinboshlarning dubulg'asi askarlarnikidan farq qilib, uchi uzun, jezdan yasalgan.

"Nusratshior sipoh ... temir va po'lat dubulg'a bilan mukammal qurollansin ("Abdullanoma");

dovudiy sovut – rivoyatlarga ko'ra, Dovud payg'ambar temirchilarning piri hisoblangani uchun ham shu ibora taomilga kirgan; **javshan** – sovut, metallardan yasalgan nimcha.

"Nusratshior sipoh, ko'p qurol-aslaha, javshan, temir va po'lat dubulg'a bilan mukammal qurollansin ("Abdullanoma");

jibo (yoki jiyba) – mudofaa kiyimlari; zirh, sovut va hokazo; **zirh** – simdan to'qilgan, o'q va tig' o'tmaydigan urush kiyimi, sovut; **zihdon** – kamon va uning o'qi solib yuriladigan maxsus xalta, sadoq.

"O'qni zihdoniga qo'ygach, uning hiloli zahrni kafiga berdi ("Abdullanoma");

kejim (yolpo'sh, bargustvon) – o'q o'tmasligi uchun otlar ustiga yopiladigan temir simlardan to'qilgan maxsus yopinchiq.

"...farangning munaqqishlaridan yasalgan bargustvon otga yopiladigan yolpo'shlar yopgan, suv oqqandek yuradigan otlarga minishib, jang maydonida jilva qildilar ("Abdullanoma");

"Otni jiybasi va kejimi bilan daryoda suzdirib, qattiq qiyinchilik bilan tashqariga chiqib oldi va kejimni kesib tashlab, shimol tomonga ot choptirdi ("Musaxxir al-bilod");

samuriy jubba – qunduz terisidan tikilgan po'stin;

tarqu – qimmatbaho ipak mato;

yaktoyi – bir yoqali ko'ylak;

qabo – jubba (sovut) ostidan kiyiladigan uzun ust kiyim;

hafton – sovutning ichidan kiyiladigan, jun yoki paxtadan to'qilgan maxsus kamzul. Bu libos ko'p hollarda oftobning issig'i metallni qizdirib yubormasligi, jangchining terlamasligi uchun sovut va javshan ustidan ham kiyilgan.

"Navkarlar qizil va to'q qizil haftonlarni kiyib, dushmanlar bilan urishish uchun yuzlandilar ("Abdullanoma").

IRODANI SINASH VOSITASI

Hikoya qilishlaricha, Amir Laysning ishlari yurishgach, Xurosonni bosib olishni xohladi.

Qurollarini taqqan holda tom ustiga chiqdi, havo g'oyatda issiq edi, sakkiz soat o'tguncha tomda turdi. Arkoni davlat shunday issiq havoda og'ir qurollari bilan turishdagi sabri va quvvatiga hayron qoldilar. Sakkiz soat o'tib, yaxshi vaqt bo'lgach, tomdan tushib, yo'lga chiqdi va maqsad sari yuzlandi. Atrofdagilar: **"Shunday issiq havoda og'ir qurollar bilan turishingizga sabab nima edi?"** – deb so'radilar. U shunday javob berdi: **"Oldida ulug' ish turibdi, unga noziklik va tan oromi bilan qadam qo'yishim xalal yetkazadi, men o'z nafsinni imtihon qildim, u issiq havoda og'ir qurol bilan tura oladimi – yo'qmi? Ko'rdimki, toqati yetar ekan! Demak, bilingizlarkim, maqsadimiz hosil bo'ldi!"** Husayn Voiz Koshifiy, "Futuvvatnomayi sultoniy" dan. Bu hikoyadan ko'rinadiki, harbiy kiyim faqat himoya vositasi emas, u irodani sinash vositasi vazifasini ham bajargan.

SAVOLLAR

O'rganishlarimiz doirasida Amir Temur davrida ham harbiy kiyimlar ishlab chiqarish juda keng miqyosda olib borilgani ayon bo'lib, bizda ko'pgina savollar paydo bo'ldi.

Aytaylik, ikki yuz ming qo'shinni kiyim-bosh bilan ta'minlash uchun qancha paxta, jun va ipak, shuningdek qancha qurol-yarog' lozim bo'lgan?

Shuncha paxta qaysi dalalarda yetishtirilgan?

Shuncha jun qaysi chorva hisobidan tayyorlangan?

Shuncha ipak uchun pilla qurtlari qayerda boqilgan?

Xizmatchilarga qancha maosh to'langan?

Iplar qayerda yigirilgan va matolar qayerda to'qilgan?

Qayerda bo'yalgan?

Ularga turli ranglarni, boz ustiga, rangi chiqmaydigan matolarni kimlar tayyorlab bergan?

Buning uchun qancha korxonalar ishlagan va qancha ishchi kuchi bu ishlarga jalb etilgan?

Bunday savollar juda ko'p, haddan ziyod. Albatta, bu savollarga zukko tarixchilarimizdan javob kutib qolish bilan birga, biz ham imkoniyatimiz darajasida kelgusi izlanish va tadqiqotlarimizni ushbu masalalarga qaratishga harakat qilamiz.

QISQA MA'LUMOTLAR

Sharq xalqlari tarixida harbiy kiyimlarning alohida o'rni bo'lib, uning o'rganilishi turli matolar – jun, paxta, ipak, zig'ir tolalarini, shuningdek temir, oltin, mis, qo'rg'oshin kabi metallarni ishlab chiqarish va unga ishlov berish kabi jarayonlarga ham aniqlik kiritadi.

Mavjud ma'lumotlarga ko'ra, Samarqandda zardo'zi, atlas, qirmizi duxoba, Hirotda kimxob, Buxoro yaqinidagi Zandana qishlog'ida zandanachi va Olachaboftan qishlog'ida olacha ishlab chiqarish korxonalar mavjud bo'lgan. Toshkent, Qarshi, Farg'ona, Surxondaryo va boshqa viloyatlarda to'qimachilik

Podpolkovnik
Mirzatilla MIRAHMEDOV,
podpolkovnik Nozim KAMALOV,
Qurolli Kuchlar akademiyasi
o'qituvchilari

O'G'IL TUG'ILSA, YER-U OSMON QUVONAR...



O'G'IL

O'g'il farzand dunyoga keldi. Karnay-surnay chaldirib, bu xushxabarni elga ovoza qildik. Uning sharafiga jonliq qurbon qilib, el-u yurtga osh tortdik. Ko'cha-ko'yda so'ragan-so'ramaganga, "Ha, askar bu", deb maqtanishdan faxr tuydik. Biz ularni orziqib kutamiz. Ha, orziqib kutamiz Vatan posbonlarini.

CHAQIRUV

Chaqiruv bo'limi binosi atrofidagi o'rindiqlarga odam sig'maydi: havo anchagina sovuq bo'lishiga qaramay, yengil kiyingan xotin-xalaj, uzun-kalta erkaklarning g'ala-g'ovuri.

Toza havodan nafas olish maqsadida hovliga chiqaman. Ayollardan biri yugurib yonimga keladi.

– Qizim, bolalarimiz qachon chiqar ekan?

– Xolajon, bolaligi qolibdimi, kap-katta yigit bo'lsalar. Uyga qaytaveringlar, tekshiruv kechgacha davom etadi.

– Ha, yo'q. Mayli, kutib turaman.

– Kutib turamiz.

Hamma shu savolning javobi ilinjida bo'lganmi, baravariga tasdiqladi.

Bolang Vatan himoyasiga otlandi, kutish nima bo'libdi!

KUZATISH

Qani, endi ko'p ushlab turmanglar, yo'lovchiga yo'l yaxshi. Ertaroq borgani ma'qul-da. Oqsoqol, duo qiling.

– Iloho omin...

– Omiin!

– Safaring bexatar bo'lsin! Oy borib, omon qayt! Halol xizmat qil, yuzimizni yerga qaratma!

Duoga ochilgan qo'llar yuzga tortildi. Mening farzandimga ham Vatanni himoya qilishdek sharaf nasib qilsin, deya havasdan namlanmagan kipriklar qolmadi.

– Zamoni qara, bizning zamonda otini eshitmagan joylarimizga xizmatga yuborishar edi. Hozir hamma o'z yurtida xizmat qilyapti. Zamonangdan aylanay, mana buni haqiqiy xizmat desa bo'ladi. Inson kindik qoni to'kilgan, erta bir kun mozoriga aylanadigan tuproqni asrashi kerak. O'zganing tuprog'ini emas.

Ammo-lekin Nosirvoy rosa orzu qilgan ekan. Bolam xizmatga otlansa, yurtga to'y qilib, osh beraman, deb. Borini sochdi.

Qariyalar oqsoqolning so'zlarini tasdiqlab, birin-ketin bosh irg'ab qo'ydi.

"Uch qizdan keyin tilab olgani er bo'ldi-yu, sochsa sochibdi-da".

XUSHXABAR

– Eshitingizmi?

– Nimani?

– Qandolat opaning o'g'liga "Jasorat" medali berishibdi.

– A, shundaymi? Eshigida tumonat odamni ko'rib, qizlaridan birortasi farzandli bo'lgandir, deb o'ylabman.

Qishloq joyda yangilik tez tarqaladi. Ha, yaxshi gapning qanoti bor. Bir zumda xonadonga butun qishloq ahli to'plandi. Biri olib, biri qo'yib, xuddi voqea ustida o'zlari bo'lgandek qahramonning jasorati haqida gapiradi. Nima emish: "Chegarada turgan ekan. Yana bir o'zi deng xumpar, bir

to'da g'alamislar chegarani buzib o'tmoqchi bo'libdi. Shunda deng, bizning qahramon ularni bir zarbada tizzalatib, oyoq-qo'lini bog'lab, boshliqlariga topshiribdi".

– Ol-a! Bir o'zi bo'lmagan. O'ziga o'xshagan bir-ikkita bilan birga ekan.

– Ee, bir o'zimi, bir nechtasimi, "zato", qahramon bo'libdi. Oliy Bosh Qo'mondonning o'zi: "Otasiga rahmat!" debdi. Barakalla! – oqsoqol xonadon boshining yelkasiga mehr-la qo'l tashlab, bag'riga tortdi. – Yuzimizni yerga qaratmabdi. Iye, Nosirvoy, shunday quvonchli kunda ham yig'laydimi?! Yig'lamang-ey, erkakka yarashmaydi.

– Boya sinfdoshlariga eriyotuvdi, oshib ketganmi deyman?

"O'g'li qahramon bo'ladi-yu, yechilsa, yechilibdi-da!"

NIYAT

O'g'lim, sen tug'lganda endi bu xonadonning chirog'i o'chmaydi, dedik. Er bu pirdir, deyilgan, pirlari bor xonadonga shayton yaqin yo'lamaydi, dedik. Alp o'g'loni bor yurtning yuki yerda qolmaydi, egasi bor qo'rg'onlarga zog'lar qadam bosmaydi, dedik. Ha, shunday dedik. Shunday niyatlar qildik. Niyatimiz xolis edi...

Kichik serjant

Dilnoza SULAYMONOVA

✓ AYYOM SHUKUHI

INSON QALBIGA YO'L

Yangi yil arafasida yurtimizning barcha joylarida bayram shodiyonalari ko'tarinki ruhda nishonlanmoqda.

Termiz davlat universiteti o'zbek filologiyasi fakulteti rahbariyati, tyutor va talabalari Yangi yil munosabati bilan Surxondaryo viloyati ftziatriya va pulmonologiya markazida davolanayotgan bolalar uchun Qorbobo va Qorqiz, ertak qahramonlari ishtirokida bayram sovg'alarini tarqatdi. Kutilmagan tashrif 100 nafardan ortiq bolajon uchun bir lam quvonch hadya etdi.

Bolajonlar bayramga atalgan she'rlarini to'liqlanib aytib berdi.

Ularining orzulari, kelajakdagi maqsadlari, ezgu niyatlariga quloq tutib, qalblar larzaga keldi. Hayot nashidasini, umr qadrini, sog'liq ne'mati va unga shukronalik tuyg'ularini mana shu jaji bolakaylar ham his qilib ulgurgan. Qorbobodan bayramga dardlariga



darmon tilagan murg'ak qalblar hech kim xasta bo'lmasligini so'radi. Ularning orasida kelajakda uchuvchi, harbiy, shifokor, san'atkor bo'lishni orzu qilganlar talaygina.

Har bir bola bilan samimiy suhbat qilib, ularga bayram sovg'alari ulashildi. Qorboboning sovg'alarini cheksiz mamnuniyat ila qabul qilib olgan bolakaylar qalblaridagi orzularini jaji barmoqchalari bilan birma-bir sanab berdi.



Ushbu xayrli tashabbus bemor bolalar va ularning oilalarini ruhiy va ma'naviy qo'llab-quvvatlash, ijtimoiy himoya qilish, bayram kayfiyati ulashish, ertangi kunga ishonch tuyg'ularini shakllantirishga xizmat qildi.

Jamshid NAZAROV,

Termiz davlat universiteti o'zbek filologiyasi fakulteti tyutori

✓ E'TIBOR

JANUB VOQEALARI ISHTIROKCHISIGA EHTIROM

Inson qadri ulug'langan mamlakatimizda amalga oshirilayotgan islohotlarning tub negizida xalq roziligi va shukronalik tuyg'ularini yanada rivojlantirish yotibdi. Mard, jasur yigitlar hamisha har bir xalqning maqtovi, faxr-iftixori bo'lib kelgan.

Mudofaa vazirligi Axborot-kommunikatsiya texnologiyalari va aloqa harbiy instituti bir guruh harbiy xizmatchilari Toshkent shahri Chilonzor tumanida istiqomat qilib kelayotgan II guruh nogironi iste'fodagi serjant Shodmon Oripov holidan xabar olish uchun xonadonga tashrif buyurdi.

Iste'fodagi serjant Shodmon Oripov 1976-yilning 22-sentabrida Buxoro tumanida dunyoga kelgan. U dastlab o'rta maktabni a'lo baholarga tamomlab, yigittlik va fuqarolik burchini bajarish uchun 1993-yilda armiya saffariga chaqirilgan. Muddatli harbiy xizmatni o'tab bo'lgach, Vatanga bo'lgan kuchli muhabbati sababli kontrakt bo'yicha harbiy xizmatini davom ettirdi.

Shodmon Oripov kontrakt bo'yicha xizmatni o'tab yurgan kezlarda 1999-yilda Angren shahrida tinchligimizga raxna solmoqchi bo'lgan qurollangan jangarilarga qarshi o'tkazilgan operatsiyalarda qatnashgan, 2000-yilda Surxondaryo viloyatining Sariosiyo va Uzun tumanlarida terrorchilarga qarshi o'tkazilgan operatsiyalarda qatnashib, Mi-8 jangovar vertolyotidan tog'li hududlarda jangarilarga qarshi ayovsiz kurash olib borayotgan vaqtda to'satdan vertolyot hujumga uchrab, yerga qulashi oqibatida u turli ko'rinishdagi tan jarohatini olgan.


Shundan so'ng iste'fodagi serjant Shodmon Oripov II guruh nogironi bo'lib nafaqaga kuzatilgan. U 2 nafar farzandning otasi. Harbiy xizmatchilar bilan bo'lib o'tgan suhbatda o'z kechinmalarini so'zlab berdi.




Mayor Sherqo'zi XAKIMOV
Mudofaa vazirligi Axborot-kommunikatsiya
texnologiyalari va aloqa harbiy instituti



GONKONG GRIPPI



O'zbekistonda shu yilning noyabr oyidan aholi orasida grippning N3N2 shtampi (A2-Gonkong) uchrayotgani to'g'risida xabarlar tarqaldi. Ommaviy axborot vositalarida Xitoy, Rossiya va qo'shni davlatlarda ham grippning bu turi asosan yosh bolalar orasida tarqalib, og'ir o'tayotganligi aytilmoqda. Ushbu kasallik 1968-yilda birinchi marta Gonkongda aniqlanib, butun dunyo bo'yicha pandemiya tarzida tarqalishi kuzatilgan va ikki yil ichida 1 mln.dan ko'p aholining o'limiga sababchi bo'lgani uchun "Gonkong grippi" deb ataladi.



GONKONG GRIPPI BOSHQA YUQUMLI KASALLIKLARDAN NIMASI BILAN FARQ QILADI?

Gonkong grippi – odam, hayvon va qush singari issiqqonilarda kasallik chaqiruvchi o'tkir respirator kasallik bo'lib, asosan nafas olish tizimini jarohatlaydi. Gonkong grippi aholi orasida tez tarqaladigan o'tkir yuqumli kasallik bo'lib, dunyoning deyarli barcha mamlakatlarida uchraydi. Bu kasallik mavsumiy bo'lib, asosan kuz va qish oylarida ko'p tarqaydi. Rossiya olimlarining ta'kidlashicha, o'tgan yili koronavirus infeksiyasiga qarshi cheklovlar olinib tashlanishi bilan aholi orasida Gonkong grippining tarqalishi kuzatilgan va hozirgi kunda oddiy mavsumiy gripp tarzida kechmoqda.

Kasallikning aholi orasida tez tarqalishida migratsiya asosiy o'rinni egallamoqda. Grippga o'xshash kasallik chaqiruvchi va bir-biridan epidemik xususiyati bilan farqlanuvchi 200 dan ortiq virus turlari mavjud bo'lganligi sababli laborator usulda tasdiqlangandan so'ng bemorga tashxis qo'yiladi. Gonkong grippining yashirin davri 1-2 kunni, ba'zida esa hatto 12 soatni tashkil etadi. Grippning yengil shakli bilan og'ir bemorlar atrofdegilar uchun ko'proq xavf tug'diradi, chunki ular kasal holatida jamoat joylarida, transportda, o'qish va xizmat joylarida kasallik tarqalishiga sababchi bo'ladi.

NEGA AYNAN KUZ-QISH FASLI BU KASALLIK UCHUN MAVSUM HISOBLANADI?

Kasallikning sovuq mavsumda ko'p uchrashining boisi kasallik tarqatuvchi virus past haroratda uzoq vaqt davomida tirik saqlanadi. Bundan tashqari, havo harorati past bo'lganligi sababli kishilarning yopiq binolarda to'planish holatlari kuzatiladi. Bu holat virusning havo-tomchi orqali tarqalishi uchun ayni muddao bo'ladi. Qish faslida inson tanasida vitamin yetishmovchiligi tufayli immun tizimi kuchsizlanib qoladi va natijada tananing gripp viruslariga moyilligi yuqori bo'ladi.

O'ZBEKISTONDA GONKONG GRIPPI BO'YICHA EPIDEMIK VAZIYAT QANDAY?

O'zbekistonda aholi orasida gripp virusining aylanib yurishi ustidan monitoring o'rnatilgan bo'lib, aholisi orasida Gonkong grippidan tashqari grippning boshqa turlari (*koronavirus, cho'chqa grippi, paragripp, adenovirus, rinovirus, respirator-sintitsial virus, bokavirus*) ham aniqlanmoqda. O'zbekistonda kasallanish darajasining nisbatan kamayishi kuzatilayotgan bo'lsa-da, yosh bolalar, ayniqsa bir yoshgacha bo'lgan bolalar orasida ko'p uchramoqda. Buning asosiy sababi bemorlarning alohidalanmasligi, o'z bilganicha davolanish, bemor bolalarni tarbiya muassasalariga yuborish deb ko'rsatilmoqda.

QANDAY BELGILARDA NAMOYON BO'LADI?

Gonkong grippi kasalligining og'irlik darajasi tananing virus toksini bilan zararlanish (*intoksikatsiya*) darajasiga bog'liq. Uning belgilari: tana bo'ylab muskullarning qaqshab og'irishi, umumiy holsizlik, tana haroratining 39 va undan ortiq ko'tarilishi, ko'z soqqasida og'riq, ko'z yoshlanishi, tomoq qirilishi, quruq yo'tal, uyquchanlik, bosh og'irishi, bosh aylanishi, ba'zida esa ko'ngil aynishi va ich ketishi kuzatiladi.

DORIXONA XODIMLARI TOMONIDAN TAVSIYA QILINGAN DORI VOSITALARIDAN FOYDALANISH MUMKINMI?

Burun oqishi, ko'z yoshlanishi va shunga o'xshash shikoyatlar faqatgina grippda bo'lmaydi. Allergik rinit, allergik sinusit, surunkali yallig'lanish kasalliklarida ham shu holat kuzatiladi. Chunki immunitet tushish hisobiga allergik kasalliklar ham xuruj qiladi.

Buni esa faqat shifokor aniqlaydi. Shuning uchun bemor allergiya bo'lganda grippga qarshi, gripp bo'lganda esa allergiyaga qarshi dorilarni iste'mol qilib yubormasliklari kerak. Chunki bu kasalliklar butunlay bir-biridan farq qiladi va ularga qarshi qo'llaniladigan preparatlarning ta'siri ham boshqa-boshqa hisoblanadi. Shuning uchun gripp yoki boshqa bir kasal bo'lganda ham atrofdegilarning, dorixonada xodimining tavsiyalariga ko'ra dori olib ichmasdan, shifokor ko'rigidan o'tib, uning tavsiyasiga binoan davolanish lozim.

O'Z VAQTIDA DAVOLANMASLIK OQIBATIDA KASALLIK QANDAY ASORATLARNI KELTIRIB CHIQRADI?

Davolash choralarini o'z vaqtida boshlanganda, kasallik 10–14 kun davom etadi. O'z vaqtida davolanmaslik natijasida Gonkong grippi og'ir asoratlarni qoldirishi bilan xavflidir. Davolash choralarini kechiktirish yoki samarasiz davolash oqibatida xastalik zotiljam, miokardit, ensefalit, meningit kabi asoratlarni keltirib chiqarishi, yurak-qon tomir, astma va qandli diabet kasalliklarining avj olishiga olib kelishi mumkin.

BEMORNI UY SHAROITIDA PARVARISHLASH JARAYONIDA NIMALARGA AHAMIYAT BERISH LOZIM?

Gonkong grippning yuqish yo'li havo-tomchi va muloqot orqali bo'lganligi sababli kasallikning oldini olishga qaratilgan tadbirlar gripp va boshqa o'tkir respirator kasalliklardagi tadbirlar bilan juda o'xshash. Chora-tadbirlarning asosiy maqsadi – viruslar sonini havoda iloji boricha kamaytirish. Virusni havoda kamaytirishda birinchi chora bu – xonani tez-tez shamollatib, havosini almashtirish va namli tozalov ishlarini amalga oshirish. Bemorni iloji boricha alohidalash zarur, yotgan xonaga imkon boricha boshqalar, ayniqsa yosh bolalar, qariyalar va homilador ayollarni kiritmaslik kerak. Bemor parvarishi bilan shug'ullangan kishi tibbiy niqob taqishi kerak. Xona harorati issiq bo'lishi lozim. Bemor shaxsiy gigiyena qoidalariga amal qilishi lozim. Bemor ishlatgan sochiq, dastro'moldan boshqalar foydalanmasligi zarur, ularni qaynatib yuvish, keyin dazmollash lozim. Idish-tovoqlar ham bemor tomonidan foydalanilgach, darhol qaynatilishi kerak. Ana shunda kasallik atrofdegilarga yuqishining oldi olinadi.

IMMUNITETNI OSHIRISH UCHUN NIMALARGA E'TIBOR BERISH LOZIM?

Birinchi navbatda kun tartibiga rioya etish lozim. O'z vaqtida uxlash, badantarbiya bilan shug'ullanish, mavsumga xos kiyinish, ochiq havoda yurish, to'g'ri ovqatlanish, jismoniy va aqliy mehnatni mujassamlikda olib borish talab etiladi. Ovqatlanganda vitaminlarga boy bo'lgan (*asosan askorbin kislotasi*) mahsulotlarni iste'mol qilish, piyoz va sarimsoq piyozni kerakli miqdorda ovqat bilan iste'mol qilish ham foydalidir. Gonkong grippi va boshqa gripp kasalliklarining oldini olishda kasallikka qarshi emlashning ahamiyati katta. Uni qo'llash qisqa muddatga faol immunitet hosil bo'lishiga olib keladi. Grippga qarshi vaksina ushbu mavsumda eng ko'p uchrashi kutilayotgan va eng xavfli hisoblanayotgan grippning bir necha shtammiga, shu bilan birgalikda Gonkong grippiga qarshi qaratilgan bo'lib, emlash ushbu shtamlar bilan organizm to'qnash kelganida kasallikdan himoyalashga qaratiladi.

Tibbiy xizmat leytenanti
X. ABDULLAYEVA,
Qurolli Kuchlar Harbiy tibbiyot akademiyasi internatura tinglovchisi,
B. AXMEDOV,
Mudofaa vazirligi
Sanitariya-epidemiologiya nazorati markazi vrach-mutaxassisi

SUN'iy INTELEKT dan INGLIZ TILINI O'RGANISH SAMARALIMI?

Intellektual texnologiyalar ta'lim sohasini ham zabt etmoqda. Bugungi kunga kelib sun'iy intellekt orqali talabalarga ingliz tilini yaxshiroq tushunish va eslab qolishga yordam beradigan innovatsion o'qitish usullarini ishlab chiqish imkonini paydo bo'ldi.

Ma'lumki, ingliz tilini o'rganishda sun'iy intellektdan foydalanishning eng samarali usullaridan biri bu onlayn o'quv platformalari va ilovalaridan foydalanish sanaladi. Bunday ilovalar katta ma'lumotlar bazasiga ega bo'lib, interaktiv darslar va testlar orqali til o'rganuvchilarda muloqot qilish imkoniyatini o'stiradi.

Sun'iy intellektdan har kim individual tarzda foydalanishi mumkin. Shuning uchun uni har bir insonning bilim darajasiga moslashtirish mumkin bo'ladi. Eng muhimi, sun'iy intellekt nutqni tahlil qilish orqali ingliz tilini o'rganishga yordam beradi. Undagi nutqni aniqlashning zamonaviy tizimlari o'quvchilarning talaffuzi va grammatikasini baholashi, ularga fikr-mulohazalar va xatolarni tuzatish bo'yicha tavsiyalar berishi mumkin. Bu esa talabalarga ingliz tilini tezroq va samaraliroq o'rganish imkonini beradi.

Umuman olganda, ingliz tilini o'rganishda sun'iy intellektdan foydalanish nafaqat o'quv jarayonini osonlashtiradi, balki har bir til o'rganuvchining individual ko'nikma va qobiliyatini rivojlantirishni rag'batlantiradi. Buning natijasida ular ingliz tilini o'zlashtirish bo'yicha o'zlari xohlagan darajaga tezda chiqa oladi.

Oliy harbiy ta'lim muassasalarida kursant va ofitserlarni tayyorlashda xorijiy tillarni, xususan ingliz tilini o'qitish ham muhim sanaladi. Zero ingliz tilini bilish boshqa mamlakat vakillari bilan muloqot qilish, turli davlatlardagi hamkasblar bilan tajriba almashish kabi imkoniyatlarni beradi. Shu sababdan ham kursantlarning til o'rganishi muhim ahamiyatga ega va bu borada sun'iy intellektdan foydalanish yanada samarali va qulaydir.

Ingliz tilini o'qitish sohasidagi sun'iy intellekt kursantlarning individual xususiyatlarini hisobga olgan holda yanada shaxsiylashtirilgan yondashuvni taklif qilishi mumkin.

Umuman olganda, sun'iy intellektni qo'llash orqali kursant va ofitserlarning ingliz tilini tezda o'zlashtirishiga xizmat qiladigan maxsus dasturlarni yaratish mumkin. Masalan, bu jarayonda nutq amaliyoti, terminologiya va frazeologiyani o'rganish, shuningdek lug'atni boyitish zarur bo'ladi. Bunday dasturlarda harbiy xizmatchilar duch

keladigan aniq vazifalar va ehtiyojlarni ham hisobga olish kerak.

Ta'kidlash joizki, sun'iy intellekt tinglovchilarga ingliz tilida muloqot qilishni o'rgatadigan chatbotlar kabi aloqa vositalarini yaratishga yordam beradi. Bu ularga mashg'ulotlar davomida amaliy vazifalarni bajarishga ko'maklashadi. Muhimi, shu sabab til o'rganuvchilarda hatto sinfdan tashqarida ham muloqotni davom ettirish imkoniyati yuzaga keladi.

Xulosa qilib aytganda, sun'iy intellekt yordamida ingliz tilini o'rganish innovatsion va istiqbolli yondashuv bo'lib, u o'quv samaradorligini sezilarli darajada oshirishga va til o'rganuvchilarning chet tilni tezroq va yaxshiroq o'zlashtirishiga yordam berishi bilan ahamiyatlidir.

Dilobar NURIDDINOVA,
Qurolli Kuchlar akademiyasi
Tillar kafedrasida katta o'qituvchisi

KELAJAGIMIZ BUNYODKORLARI



O'zbekiston Respublikasi Qurolli Kuchlari akademiyasida muntazam ravishda yoshlarni harbiy-vatanparvarlik ruhida tarbiyalashga qaratilgan keng qamrovli tadbirlar o'tkazilishi an'anaga aylangan.

ELNING ERTASI UCHUN

Ana shunday tadbirlardan biri Yashnobod tumanidagi 28- hamda Mirzo Ulug'bek tumanidagi 207-, 210-umumta'lim maktablari o'quvchilari ishtirokida o'tkazildi.

Tadbir davomida ertamiz egalari kursantlarning kun tartibidan o'rin olgan qiziqarli jarayonlar, ko'rgazmali mashg'ulotlar, yaratilgan shart-sharoitlarning guvohi bo'ldi va

o'zlarini qiziqtirgan savollariga soha mutaxassislari tomonidan atroflicha javoblar oldi.

Kutubxonada o'tkazilgan ijodiy suhbat va madaniyat markazida tashkil etilgan konsert dasturi barchaga xush kayfiyat ulashdi. Bundan tashqari, yoshlar uchun tashkil etilgan o'quv-moddiy bazalar, qurol-aslaha va harbiy texnikalar ko'rigi

bilan birga harbiy xizmatchilarning qo'l jangi chiqishlari tomoshabinlarga bayram shukuhini hadya etdi.

Mazkur tadbirlarning muntazam o'tkazib borilishi o'sib kelayotgan avlod qalbida vatanparvarlik tuyg'ularini shakllantirish, ularda el-yurtning ertasi uchun xizmat qilishga ishtiyogini oshirish bilan birga kelgusida mamlakatimizning

barcha sohalari uchun tashabbuskor, jonkuyar, halol va o'z kasbiga sadoqatli kadrlarni voyaga yetkazishda dasturulamal bo'lib xizmat qiladi.


Polkovnik
Abdulhamid XOLDOROV,
Qurolli Kuchlar akademiyasi
Harbiy san'at kafedrasida o'qituvchisi

Mana, hademay, umrimizning yana bir yili ortda qoladi. Qarang, vaqt shunchalik uchqur otki, uning qanday o'tganini ko'pchiligimiz sezmay ham qoldik. Beixtiyor bosib o'tgan hayotimiz bir-bir ko'z o'ngimizdan o'ta boshlaydi. Axir yil oxiri – sarhisob pallasi-da. Ortga nazar tashlab, qilingan ishlar tahlil, yutuqlar e'tirof etiladi. Xo'sh, o'tayotgan 2023-yil "Vatanparvar" gazetasi tarixida, jamoadoshlar hayotida qanday iz qoldirdi? Quyida shu haqda o'qiydiz.

BIZNI

KUZATISHDA

DAVOM ETING



Katta leytenant
Islomjon QO'CHQOROV



Begali ESHONQULOV



Zulfiya YUNUSOVA



Katta leytenant
Dilshod RO'ZIQULOV

Mustaqillik bayrami – sururli ayyom. Joriy yilgi mustaqilligimizning 32 yillik bayram tantanalari ikki hamkasbimizning hayotida o'chmas iz qoldirgani bilan yanada shukuhli bo'ldi, desak, yanglishmaymiz. Ya'ni bayram arafasida O'zbekiston Respublikasi Prezidenti farmoniga ko'ra, Mudofaa vazirligi Axborot va ommaviy kommunikatsiyalar departamenti "Vatanparvar" birlashgan tahririyati bo'lim boshlig'i katta leytenant Islomjon Qo'chqorov "Kelajak bunyodkori" medali bilan, kotibiyatning yetakchi mutaxassisi Begali Eshonqulov esa "Shuhrat" medali bilan taqdirlandi. Ularning ikkisi ham O'zbekiston Yozuvchilari uyushmasi a'zosi. Yosh bo'lsalar-da, ijodda allaqachon o'z o'rniga ega bo'lib ulgurgan shoirlar. Katta davlat tadbirlaridagi ishtiroki ularni butun O'zbekistonga yanada taniqli qilgani rost. Iqtidorli, o'z uslubiga ega bu ikki shoir joriy yilda respublika miqyosida

o'tkazilgan "Vatan manzumasi" adabiy-ma'rifiy konsert dasturlarida faol ishtirok etdi.

Islomjon Qo'chqorov qalami o'tkir jurnalistlardan. Uning ijod namunalari qator respublika nashrlarida e'lon qilingan.

Begali Eshonqulov esa she'riyat ixlosmandlariga Bek Ali taxallusi orqali yaxshi tanish. U nazmda dostonchilik an'anasini ham davom ettirib kelayotgan ijodkor. Uning "Elomon" dostoni fikrimizning yaqqol isbotidir.

Davlat mukofoti sovrindori, bir necha to'plamlar muallifi Zulfiya Yunusovaning vatanparvarlik, yurtga sadoqat, insoniylik, mehr-muhabbatga yo'g'rilgan hikoyalarini albatta o'qigansiz.

Hamkasbimiz milliy armiyamizda kechayotgan islohotlar mazmun-mohiyatini ommaviy axborot vositalarida keng yoritish orqali harbiy-vatanparvarlikni targ'ib-tashviq

qilishda alohida jonbozlik ko'rsatib kelyapti.

Joriy yil Zulfiya Yunusova uchun ham omadli keldi. Ijodkor O'zbekiston Yozuvchilar uyushmasi tomonidan "Yangi hayot uchun, Yangi O'zbekiston uchun!" shiori ostida Vatanimiz mustaqilligining 32 yilligiga bag'ishlab o'tkazilgan "Vatan uchun yashaylik!" respublika tanlovi sovrindori bo'ldi.

Katta leytenant Dilshod Ro'ziqulov joriy yilda "O'zbekistonda harbiy jurnalistikada axborot integratsiyasining nazariy va amaliy xususiyatlari" mavzusida doktorlik (PhD) dissertatsiyasini himoya qilib, filologiya fanlari bo'yicha falsafa doktori ilmiy darajasiga ega bo'ldi. Uning bu natijasi yil yakunida mudofaa vazirining

"Namunali xizmati uchun" ko'krak nishoni bilan taqdirlandi.

Yaqinda dotsent ilmiy unvonini olish uchun maxsus imtihondan muvaffaqiyatli o'tdi. Dilshod ilmiy faoliyatini yana davom ettirish niyatida.

Ham ijodda, ham harbiy xizmatda, ham ilmda yuqori marralarni zabt etayotgan hamkasblarimizga yangi yilda ham zafarlar yor bo'lishini tilaymiz.

TAHRIRIYAT

@Vatanparvargazetasi_bot
"Vatanparvar" birlashgan tahririyati bilan bog'lanish uchun telegram bot



SHU SONNING
ELEKTRON SHAKLI

VATANPARVAR

MUASSIS



O'ZBEKISTON
RESPUBLIKASI
MUDOFAA
VAZIRLIGI

www.mudofaa.uz

Tahririyat kengashi:

general-mayor Hamdam Qarshiyev
polkovnik Otabek Yuldashev
polkovnik Alisher Boboxonov
Maqsud Abilov

Tahririyatga kelgan qo'lyozmalar taqriz qilinmaydi va mualliflarga qaytarilmaydi. Mualliflar fikri tahririyat nuqtayi nazaridan farqlanishi mumkin.

Gazeta Mudofaa vazirligi Axborot va ommaviy kommunikatsiyalar departamenti – "Vatanparvar" birlashgan tahririyatining kompyuter markazida sahifalandi.

Bosh muharrir:

podpolkovnik Ahror Ochilov

ISSN 2010-5541

Gazeta O'zbekiston Matbuot va axborot agentligida 2008-yil 6-iyunda 0535 raqami bilan ro'yxatga olingan.

Telefonlar:

kotibiyat: 71 260-36-50
buxgalteriya: 71 260-35-20
yuridik bo'lim: 71 260-29-41
faks: 71 260-32-29

Navbatchi: katta leytenant Dilshod Ro'ziqulov

Sahifalovchi: Nodirabegim Ne'matova
Musahhih: Mastura Qurbanova

Buyurtma: V-5666
Hajmi: 6 bosma taboq
Bichimi: A3
Adadi: 30 126 nusxa
Bosishga topshirish vaqti: 14:00
Topshirildi: 14:30

Gazetaning yetkazib berilishi uchun obunani rasmiylashtirgan tashkilot javobgar.
Gazetaning poligrafik jihatdan sifatli chop etilishiga "O'zbekiston" NMIU mas'ul.

Gazeta juma kuni chiqadi.
Gazeta 1992-yilning 24-iyunidan chiqq boshlagan.

Nashr ko'rsatkichi: 114.
Bahosi: kelishilgan narxda.

"O'zbekiston" nashriyot-matbaa ijodiy uyi bosmaxonasida chop etildi.
Bosmaxona manzili: Toshkent shahri, Alisher Navoiy ko'chasi, 30-uy.

1 2 3 4 5 6

Manzilimiz:
100164, Toshkent, Universitet ko'chasi, 1-uy.